



الإبداع العربي

مسرحية


إثْر حَادِثَ أَلِيمٍ

نعمان عاشور



منتہی سور الأزہبکیتہ

WWW.BOOKS4ALL.NET



الإبداع
المعنى
مسرحة

إشرحات أليم :

إشراح دث أليم

كوميديا انتقادية ساخرة

نعمان عاشور



المكتبة الوطنية للتراث والثقافة

١٩٨٥

الشخصيات

- الاستاذ احمد فتوح - الابن الاصفر للعائلة - خريج تجارة -
● عمره ٣٠ سنة .
- ثريا هانم - والدته - تخطت الخامسة والخمسين .
- الهام - شقيقته الصغرى - عمرها ٢٥ سنة .
- سهام - الشقيقة الكبرى - عمرها ٣٥ سنة .
- الست سونه - زوجة حسنين بيه - نقولها فوق الاربعين .
- حسنين بيه - زوجها والشريك الثانى - عمره ٤٨ سنة .
- الاستاذ بركات - محامى العائلة - لم يصل الى الاربعين .

● الاسطى ذهب - محسوب العيلة وشريكها - فى الخمسين من
عمره .

● الست ام متولى - صديقة ثريا هانم وجارتها فى المدفن - فى
حوالى الأربعين .

● رافت - خطيب الهام - عمره ٣٢ سنة .

● البت سكيئة - كانت تخدم فى بيت العيلة - عندها ٢٣ سنة

● سائق العيلة - مالوش عمر ٠٠ واسمه حسين

الفصل الأول

المنظر :

القاعة الكبرى لفيلا الفتوح وتشغل معظم فراغ الطابق الأرضي . وهناك صالون فخم على نمط صالونات الامام السينما ومسلسلات التلفزيون يقع في مقدمة المسرح بعد الرطب مباشرة وهو الذي يجري عليه التمثيل . واجه القاعة على يمين المشاهد تؤدي الى مكتب لا يظهر فيه شئ . بالطبع الا انه مكتب الراحل الفيد فتوح بك والجهة اليسرى تقودنا الى خارج الفيلا . . بينما لا توجد السلالم المعتادة الموصلة الى الدور العلوى وانما يشغل حائط الوسط الممتد حتى نهاية العمق البعيد لخشبة المسرح ، يفترض انه اسانسير لا يرى منه الا باب يفتح او يفلق ليخرج منه او يدخل اليه النازلون والصاعدون . وهناك العديد من التحف المتناثرة في ارجاء المكان . . ويبدو ان كل شئ في المكان كان مغطى بملايات بيضاء بسبب حزن العائلة على موتها . . احمد فتوح النجل الاصفر يزيج ما تبقى من اغطية بيضاء عن الكنب والمقاعد وبقية اثاث الصالون . . ومعه الخادمة . . البت سكيئة .

أحمد : نفضتى البلاوى دى كلها ولا لسه يابت
ياسكينة !؟

سكينة : ماانتش شايف حضرتك بيلمعوا ازاي !!
أحمد : تعالى شيلي بقية المصايب دى من فوق الكنب
والكراسى .. ورجعى الصالون لحاله ..

سكينة : الست هانم حتزقق .. دى لسه جايه ليلة
امبارح من القرافه بعد ما فرشت فيها أوضتين
كاملين ..

أحمد : احنا هنا مش فى قرافه .. ناس بقى لهم تلت
شهر ميتين .. أوعى تكونى قلتى لها انك
وضبطى أوضة المكتب لحسن دى محرمة عليه
أدخلها !؟

سكينة : وقفلاها بالضبة والمفتاح ..
أحمد : أنا الصبح اديتك مفاتيحها ..
سكينة : وضبطها يابيه ...

أحمد : (يرى المعامى مقبلا) أيوه .. وادى المعامى
وصل .. أتفضل يا أستاذ بركات .. طبعا جبت
كل أوراق التصفية معاك .. حنقعد فى مكتب
المرحوم بابا ...

المحامي : الله يرحمه .. لحد الساعة دى أنا لسه مش
قادر أتصور اللى حصل يا أحمد بيه !!

أحمد : قضى الأمر .. حنعمل آيه !! والحمل كله وقع
على أكتافى .. (ويتوجه لسكينة) اطلعى يابت
هاتى ماما .. خليها تنزل بالأسانسير قوام ..
بيننا يا أستاذ بركات (ويمد اليه يده فيلاحظ أنه
لا يحمل الا دوسيتها واحدا) هى دى كل
أوراقك !؟

المحامي : الأوراق فى العربية .. حيجيبها الزملاء
المساعدين ..

أحمد : اتفضل .. (واذ يرى سكينه) اتحركى ..
واقفه كده ليه ؟

سكينة : الست هانم مش حترضى تنزل معايا ..

أحمد : خدى لها الهام أختى تنزلها ...

سكينة : والست اللى معاها؟! الست سونه مرات حسنين
بيه ...

أحمد : نزليها رايخه .. قولى لها جوزها جاى للتصفية
.. وتلاقيها عارفه وجايه مخصوص علشان كده
.. أهلا .. أهلا يا أستاذنا .. اتفضل ..

[سكينه تتجه الى باب الاسانسير الذى يفتح فجأة
وتخرج منه الست سونه]

سكينه : (وهى تتقدم وراءها الى الصالون) نازله
لوحدهك ياست هانم !؟

الست سونه : مش راضيه تنزل .. سبت بنتها تتحايل
عليها .. لسه ماحدث منهم جه !؟

سكينه : المحامى .. والاستاذ احمد دخل معاه مكتب
المرحوم ..

سونه : وحسنين بيه .. جوزى ...

سكينه : (اذ تراه مقبلا) وصل بالسلامه اهه ..

سونه : طب روى اعلمى لنا قهوة احنا الاتنين . أنت
اتأخرت ليه !؟

حسنيين : فت على البنك .

سونه : أوعى تكون خدت حاجه من حساباتى !؟

حسنيين : صفيتها على الآخر .. أمال كنت حاسحب من
رصيدى قبل مانوصل لأى حل فى التصفية !!

سونه : ووديت الفلوس فىن !؟

حسنين : فرقتهم على سبع بنوك .. البلد فيها خمسين
بنك ..

سونه : باسمى !!

حسنين : طبعا باسمك .. امال باسم ابويا ..

سونه : وناوى تعمل ايه معاهم يا حسنين ؟

حسنين : اما نشوف الأول المحامى وصل لآيه .. لسه
راجع أول امبارح من أوروبا .. كان عند المقدم
نصار بيه .. راح له سويسرا وراح له ألمانيا
والآخر لقاء فى بروكسل ..

سونه : وما جابوش معاه ؟!

حسنين : بعث الست مراته بداله .. بتوكيل عنه ..
هو ما حدش راح يقابلها فى المطار ؟!

سونه : وما يجيش هو بنفسه ليه ؟!

حسنين : ما عندوش وقت .. ما انتى عارفه انه ما يقدرش
يرجع مصر تانى .. خلاص استقر فى أوروبا ..

سونه : ليه بقى !! هو مش كان عضو ثوره ..

حسنين : ماكانش ولا نيلاه .. هو اللى كان مطلع على
روحه انه من الضباط الأحرار

سونه : ازای !! دا واخذ نياشين فى حرب اليمن ..
حسنين : كان من رجالة المشير ..

سونه : هما دول اللى جنوا على الثورة ولسه لحد الساعة
دى بينهشوا فروتها ..

حسنين : جبتي الكلام ده منين !؟

سونه : روح اسأل الاستاذ أحمد .. بيقوله لهم فى
وشهم .. فى كل ساعة وفى كل لحظة ..

حسنين : جنوا عليها ازای !! مش هما اللى عاملينها !؟
سونه : عملوها وبعدين خدوها لحسابهم وكتبوها
بأسمهم ..

حسنين : هى شركة ولا ثورة ...

سونه : كلام الاستاذ أحمد .. وانا مالى .. وانا بافهم
فى السياسه !؟

حسنين : والله مابتفهى فى حاجه .. كلام سى أحمد
ده حيودينا فى داهيه .. خرينا فى اللى احنا فيه
.. المهم اللى موجودين هنا واحنا موجودين معاهم
.. مالنا احنا ومال الثورة ..

سونه : الله ۰۰ انت حتممل لی ثوره ۰۰ وانا ذنبی
ایه ۰۰

حسنین : یاولیه ماتدخلیش نفسک فی حاجه معاهم ۰۰
وابعدی عن کلام سی أحمد ۰۰ فاهمانی ۰۰
سمعانی ۰۰

سونه : اسکت ۰۰ اسکت لحسن جابوها ۰۰ بیجرجروها
من الاسانسیر

حسنین : هی مین ؟!

سونه : ثریا هانم مرات المرحوم ۰۰ (وتقبل ثریا هانم
ومعها ابنتها)

الهام : (مقبلة بامها) علی مهلك یاماما ۰۰ وقفتی
لیه ؟!

سونه : (تقوم الیهما) امسکی نفسک یاهانم ۰۰ واحده
واحده یاستی ثریا ۰۰ واحده واحده ۰۰۰

الهام : اتحرکی یاماما ۰۰ (وتسیر معهما)

ثریا هانم : سیبوا ایدی وسیبوننی ۰ (وتتلفت حولها)
دا قلب حال الدنيا ۰۰ هو عمل ایه فی الصالون!!
أنا قلت سنه بحالها حزن دایم ماينقطعش ۰۰

الهام : خلاص بقى ياماما ..

ثرىا هانم : يامصيبتى .. وانتى كمان ياالهام حتنسى
فاجعة أبوكى وأخوكى وخالك ..

سونه : هى قصدها يعنى ياست هانم ..

حسنين : (الذى تقدم ليستقبلها) الحى أبقى من
الميت ..

ثرىا هانم : (وهى تتساند لتجلس) ياريتنى كنت رحت
وياهم ومت وياهم .. ياما قلت له خدنى معاك
يافتوح .. أخوكى عادل الله يرحمه هو اللى قال
لى خليكى مرتاحه .. علشان هما يموتوا وحدهم
ويسيبونى للشقا والهم والهوان ..

الهام : ياماما انتى أصلك عيانه من الاول .. أمال
هما كانوا عاملين لك الاسانسير ليه !؟

ثرىا هانم : خلاص انهد حيلى .. أروح فىن بعدك
يافتوح .. أعمل ايه من غيرك يا عادل .. حتى
أخويا سليمان .. أخويا الوحيد .. يموت معاهم
راخر .

الهام : احنا حنرجع تانى لكلام القرافه ...

ثرىا هانم : حاروح أعىش هناك جنبهم ٠٠ ماعدش
لىه وىجود فى الدنيا معاكم ولا معى حد تانى
أبدا ٠٠٠

سكىنه : (تقبل) القهوة ياسعادة البىه ٠٠٠

حسنين : حطىها الساعة دى ٠٠ ارتاحى ياثرىا هانم
ورىحىنا معاكى ٠٠ (وىلتفت لالهام) حد راح
ىقابل اختك فى المطار!؟

الهام : بعتنا لها عربىة ٠٠

ثرىا هانم : انتى اللى كان لازم تروحى لها بنفسك ٠٠
الهام : واسىبك لوحدك ٠٠

ثرىا هانم : هو انا بعد كده كان حىبقى لىه قىمه ٠٠
خصوصا عندك انتى ٠٠ واخوكى سى أحمد ٠٠
هو اختفى راح فىن!؟

حسنين : جوه معى المحامى ٠٠ أنا حا ادخل أشوف عملوا
أىه!؟

ثرىا هانم : والطرف الثالث يا حسنين بىه ٠٠
حسنين : المقدم بعث سهام هانم بتوكىل عنه فى كل
شىء ٠٠

ثريا هانم : حرمها من دفنة أبوها وأخوها وخالها ..
وكمان يشحنها من أوروبا لوحدها .. نصار
يعملها .. ليه لاء .. ماهى مش محتاجه لاذن
استيراد زى بقية الشحنات بتاعته ..

سونه : مانتى ياثرىا هانم عارفه انه مايقدرش
يرجع ..

ثريا هانم : ليه ياأختى .. هما مش ألفوا الحراسة
وألغوا المصادرة .. ودا .. لا عليه حراسة
ولا عليه مصادره ..

الهام : ياماما الى نقوله نعيده .. آبيه نصار عليه
حكم وهو نفسه مش عاوز يرجع ..

ثريا هانم : هو الى كان بيصدر لهم من بره بره ..
أبوكى الله يرحمه قايل لى .. وفى ايده روح
الشركات وله النص بالنص .. وانا تايهه عن
حاجه !؟

سونه : هدى بالك ياثرىا هانم .. وخليكى انتى فى
حالك ..

[فى تلك اللحظة تماما يقبل أحمد مندفعاً من
المكتب]

أحمد : ماما نزلت !؟

ثرىا هانم : نزلت يا حبيبي على ملاوشى ..

أحمد : مانزلتيش ليه فى الاسانسير .. دول كانوا
عاملينه مخصوص علشانك

ثرىا هانم : خلاص يا احمد .. نسيت أخوك وأبوك
وخالك ..

أحمد : أمال أنا غرقان فى ايه !؟ مش فى الذكريات
الحلوه اللى سابوهالى فوق دماغى ..

ثرىا هانم : بقى يقتل أبوك وأخوك وخالك ويطلعوه
من غير كفاله ..

أحمد : ماقتلهمش .. ردى عليها انتى يا الهام ...
الهام : قضاء وقدر .. كان حادث غير منطقى وغير
معقول ..

ثرىا هانم : بتتكلّمى بالفلسفة .. ماهو انتى أصلك
بتاعة فلسفة .. مش متخرجة من كلية فلسفة

الهام : فلسفة ايه .. دا قرار النياية ..

أحمد : بحكم القانون .. الاسطى ذهب طلع ماعليهوش
ذنب ..

ثرىا هانم : شوفى كلامهم ٠٠ قانون ٠٠ ابوكوا عمره
ماعصى عليه القانون وهو حى ٠٠ مايطبقوش
عليه القانون الا بعد مايموت !! عاجبك كده
ياستى سونه ٠٠ أخويا يروح فى شربة ميه ٠٠
الهام : حادث وراء الخيال ٠٠٠

سونه : أمر الله ياثرىا هانم ٠٠ واحنا بايدنا آيه ؟!

ثرىا هانم : لكى حق انتى كمان ٠٠ ماهو أصل جوزك
واخذ الجانب الزراعى ٠٠ عجول وفراخ وبيض
٠٠ ايه اللى كان حينليه يروح معاهم يستلم مكن
وعدد وآلات واتومبيلات ٠٠ كفايه عليه العزب
والمزارع ٠٠٠

سونه : حسنين شريكهم فى كل خطوة ٠٠ انتى كنتى
عاوزاه يموت وياهم ؟

الهام : ياماما دا مش كلام ٠٠ انتى خلاص فقدتى
وعيك ٠٠

ثرىا هانم : وعى وعقلى وخيالى ٠٠ أنتى مش بتقولى
حادث وراء الخيال ؟!

أحمد : قضاء وقدر ٠٠ اراده ربنا ٠٠٠

ثريا هانم : الاعدام مايكفنيش فيه .. تموت تلاته
وتخرج من غير كفاله ياسطى دهب !! استأنفوا
الحكم طوالى .. انا حاقول للمحامى ..

أحمد : حكم ايه !! ماصدرش أحكام .. التحقيق أثبت
ان الحادثة قضاء وقدر

ثريا هانم : سامعين ياناس .. بيعامى عن السواق ..
ماهو أصله كان واحد من الكادحين بتوعك ..
من بناء الاشتراكية يا حبيبي .. فاكرك .. فاكرك
أيام الاشتراكية بتاعتك ..

أحمد : اسكتى أحسن لك !!

سونه : معلش يا أستاذ أحمد .. مامتك معذورة ..

أحمد : قضاء وانتهى وقدر وحل .. الاستاذ بركات
المحامى كل مايغزيني يقول .. كفايه انهم ماتوا
وهما على القمة ..

ثريا هانم : قمة ايه يا ابني .. كانوا طالعين جبل ..
انتوا مش بتقولوا وقعوا فى الترة ؟!

الهام : ياماما .. المحامى قصده ماتوا بشرف ..

ثريا هانم : لاء .. هو قصده قمة الثروة .. القمة اللي

بيلهف منها كل سنه ألفات ٠٠ دا بقى أغنى منهم
٠٠ تصورى ياستى سونه كان فارض عليهم نسبة
من كل عقد ياخذها بالعملة الصعبة ٠٠ ياختى
وانا حاقول لك ٠٠ جوزك حسنين بيه ماهو
شريكهم وعارف المخبى ٠٠ وتلاقيه عنده قدهم
كلهم واكثر ٠٠

سونه : حسره عليه ٠٠ ماعدش عندنا فى البنك
مليم ٠٠ حسنين لسه سائل النهارده فى البنك قبل
ماييجى ٠٠ أصلهم كانوا دخلوه معاهم فى الصفقة
الأخرانية بكل اللى حيلته ٠٠ ومين عارف حتكون
نتيجتها أيه !؟

ثريا هانم : لحد الساعة دى ٠٠ أنا مش مصدقه اللى
حصل ٠٠ يوم الاربعين كان متهيألى ان هما التلاته
حيدخلوا عليه راجعين من اسكندرية ٠٠ يانارى
ياعادل ٠٠ ياخسارة يافتوح ٠٠ ياعينى عليك
ياسليمان ياخويا ٠٠ صوتى معايا ياستى سونه
٠٠ صوتى ٠٠ ياخرابى ٠٠ يامصيبتى ٠٠
ياخرابى

المحامى : (مقبلا) أيه الحكاية ياأستاذ أحمد ٠٠
حصل أيه !؟

أحمد : ماما لسه مش مصدقه انهم ماتوا ...

ثرىا هانم : تعالى هنا ياأستاذ يامحامى ..

الهام : حاسبى ياماما ...

ثرىا هانم : سؤال واحد بس .. انتو مش لحقتم

تحصلوا دفع الصفقة الاخرانية!؟

المحامى : اتحصلت وكل شريك خد نصيبه ياهانم ..

ثرىا هانم : وانت طبعا وصلتك النسبة ...

الهام : وبعدين بقى ياماما !!

أحمد : (يسحبه من أمامها) اتفضل يامتر .. نكمل

شغلنا ...

ثرىا هانم : هما بيعملوا آيه فى مكتب المرحوم ..

سونه : مراجعة كاملة لموقف الشركة علشان التصفية

الهام : مش كانوا صفوها قبل كده!؟

ثرىا هانم : دى تالت مره يالهام ..

سونه : لاء ياستى هانم وانتى الصادقه .. دى تالت

شركة مش تالت تصفية . حسنين جوزى أصله

شريك فى التلاته ..

ثريا هانم : خدنا آيه من الشركات . . خدنا آيه غير
الموت !

سونه : ياثر يا هانم قولى الحمد لله . .

الهام : أحمد أخويا بيقول اننا حنطلع على الأقل بخمسين
مليون . .

ثريا هانم : ولا لهم قيمه . ياريتنى كنت رحت معاهم
وغرقت معاهم .

الهام : وأخرتها ياماما !!

ثريا هانم : أبوكى الله يرحمه هو اللى مارضيشى . .
قال ورانا أشغال كثير فى اسكندرية ومش حنستلم
المرسيدس للمرحوم عادل الا بعد يومين . .
ياضنايا ياابنى مالحقش يركبها ويتهنى بيها . .

الهام : (تنساق معها) ياريته ماكان ركبها . . وهو كان
ناقص عربيات . . دا عنده اتنين بيجو وواحد
فولفو وتلاته فيات . . هو اللى صمم يسوقها بعد
ماخرجوها من الجمرک والاسطى ذهب كان رايح
مخصوص معاهم علشان يرجعهم بيها . . .

ثريا هانم : يقوموا يركبوه الكاميون علشان يموتهم
هما التلاته . .

الهام : عادل أخويا الله يرحمه هو اللي صمم ..
ثريا هانم : فرحان بيها .. جياته مخصوص من ألمانيا
ومدفوع فيها خمسة واربعين ألف منهم ٧٠ ألف
فرنك خدوهم من حسابي .. عربية تفصيل ..
[يدخل أحمد يقاطعهم]

أحمد : مافيش خبر من المطار؟! سهام لسه
ماوصلتش!؟

ثريا هانم : هو مين اللي راح يجيبها؟! أوعوا تكونوا
بعتوا الاسطى ذهب!؟

أحمد : ذهب فى بروكسل مع جوزها بقى له اسبوعين ..
ثريا هانم : هربان من المحاكمة زى نزار ..

أحمد : أما توصل سهام .. ابعتوها لنا طوالى .. معاها
توكيل بتفويض نهائى من جوزها .. والأوراق
لازم تكون ممضية النهارده من الشركاء الثلاثة ..

ثريا هانم : انت عاوز تخلص بأى طريقة .. علشان
تاخذ نصيبك وتصرفه على القلاضيش بتوعك ..

أحمد : أنا عاوز أريحكم واريح نفسى منكم ومن
فلوسكم .. وانتى عارفه كويس عمر الفلوس
ماكان لها عندى قيمة ..

ثريا هانم : ايدك سايبه ومبعتر ..

الهام : هو انتو حتصفوا الشركات يا احمد ..

أحمد : المقدم نصار جوز آختك هو اللي طالب كده ..
بعتناله الاسطى ذهب يراجعه والظاهر انه ماقدرش
يقنعه .

ثريا هانم : وماتبعتوش الا الاسطى نيله .. هو سواق
ولا شريك ..

أحمد : له الخمس فى التلت شركات .. مش كان
الدينامو بتاعهم .. وله كمان حق الامضا على كل
العقود وكل الشيكات ..

سونه : الاسطى ذهب !!

الهام : معقوله يا احمد !؟

أحمد : مش معقوله ليه .. دا هو الأصل فى الثروة ..
ولا اكمنه كان سواق فى جراج .. ما هو أبويا
كمان كان سروجى عربيات معاه ..

ثريا هانم : بيكره أبوه وبيحتقر أهله !؟

أحمد : ياماما أفهمينى .. أنسى نهائيا ان الاسطى
ذهب سواق ..

سونه : ما احنا عارفين انه شريك ..

ثرىا هانم : فهمت .. فهمت . ماهو علشان كده قتلهم
وانشاء الله حيقتل الباقين .. زمانه قتل نصار
جوز اختكم هناك .. فى البلد اللى راح له فيها ..
وقليل ان مارجع يموتنا واحد ورا التانى .

أحمد : بلاش تخريف ياماما ...

ثرىا هانم : دا قاتل دولى .. ومحترف قتل ..

سونه : يا خرابى .. ليكون من بتوع العصابات اللى
بيطلعوا فى الحلقات البوليسية الأمريكانى .. دا
التليفزيون مليون بيهم ..

الهام : أيه الكلام ده ياستى سونه !؟

سونه : سى أحمد .. وحياتك يا ابنى تندهلنى حسنين
من جوه .. حسنين (وتقترب من باب المكتب)
يا حسنين (وتشير له) تعالى يا حسنين ..

حسين : (مقبلا) فيه حاجه يا أستاذ أحمد !!؟

سونه : اكتشفنا حقيقته .. طلع من بتوع المافيا ..
ثرىا هانم : وحيقتلنا كلنا على الطريقة الأمريكانى ..
الهام : جرى أيه ياماما .. دا هوس سيكولوجى ..

ثريا هانم : ماتكلمنيش بالفلسفة بتاعتك ..

حسنين : عاوزانى ليه ياوليه !؟

سونه : وليه !! صدق اللي قال .. الواطى طول عمره
واطى مهما يعلى .. مش قادر تنسى أيام الجزر
واللفت

حسنين : ماتزعليش يا برنسيه .. عاوزانى ليه !؟

سونه : تعالى انقذنا .. حياتنا كلنا فى خطر ..

ثريا هانم : حسنين بيه .. قال صحيح الاسطى ذهب
له نصيب الخمس فى التلت شركات ؟

حسنين : تدبيره قانونية عاملها المعامى ..

ثريا هانم : يبقى حيقته راخر ...

حسنين : عاملها بموافقتنا ورضانا جميعا ..

احمد : لانه متحمل المسئولية عنكم جميعا ..

الهام : انا سامعه حس عربية .. سهام وصلت ..
سهام وصلت ..

احمد : نقابلها قوام .. معانا يا حسنين بيه (ويخرج
ثلاثتهم)

ثريا هانم : طب ومدام له الخمس .. بيشفلوه سواق
ليه !؟

سونه : يا اختى والنبي انا ماعنت فاهمه حاجه من اللى
بيعملوها يا ثريا هانم .

ثريا هانم : (تستقبل سهام) أهلا يا حبيبتي يا بنتى ..
تعالى ياسهام .. تعالى .. شفتى اللى جرى لنا
واللى حصل لنا !؟

سهام : أمر الله ياماما .. أزيك ياسونه هانم ..
(ويتبادلون القبل)

سونه : شدى حيلك يا بنتى ..

سهام : مصيبة كبيرة .. نكبه .. كارثة حلت على غفله
وقضت على الكل ..

ثريا هانم : قال وما يقتلش الا التلاته اللى فيهم ..

سهام : هما ماتوا مقتولين .. الاسطى ذهب وصف لنا
الحادثة لما جالنا فى بلجيكا .. (الهام تكون الآن
قد وصلت هى وأحمد وحسنين بك)

الهام : ماتصديهاش ياسهام .. الحادثة قضاء
وقدر

ثريا هانم : الاسطى ذهب هو الى قائلهم .. أحمدى
ربنا . نفدتى منه بجلدك .. ابعتى تلفراف
لموزك حذريه منه ..

سونه : هو انتى سايباه معاه لوحده !؟

سهام : الاسطى ذهب زمانه دلوقت فى سويسرا .. رايح
زيورخ ..

حسنين : ما احنا الى باعتينه .. علشان يجيب لنا من
هناك كشوف الحسابات ومستندات الصرف
والايداعات .. والمقدم ضرورى يكون معاه ..

ثريا هانم : حيقته هناك ..

سونه : جريمة فى زيورخ ..

حسنين : انتى بتخرفى بتقولى آيه !؟

أحمد : الظاهر انه فلم بولىسى شفته فى التلفزيون ..

ثريا هانم : ماتسكتيش ياسهام . وابتعى لموزك
تلفراف قوام

الهام : اهدى ياماما .. اهدى .. وحشتينا ياسهام
ياحبيبتي ..

سهام : وانتى أكثر والنبي يا الهام .. (ويتبادلا
الأحضان والقبل مرة أخرى)

أحمد : طبعا جبتي معاكي التوكيل والتفويض ..
حسنين : اتفضل ياأستاذ أحمد نجهز احنا بقية الأوراق
على الامضاءات ونسيبهم لبعض على ماترتاح سهام
هانم من السفر والطيارة ..

سهام : الحقيقة أنا مرهقة جدا .. فى شدة الارهاق
.. تريحه فاتيجه ..

أحمد : ارتاحى وانا راجع لك .. (ويخرج مع حسنين
الى غرفة المكتب)

ثرىا هانم : مستعجل !! عاوز يخلص منا بأى طريقه !!
سهام : (تتمدد) اعملوا لى قهوة .. شدى حيلك ياماما
البركه فيكى .. ياترى عامله آيه ..

سونه : عامله اللى مايعمل .. فرشت أوضتين فى
المدفن ..

الهام : وبتروح تقضى الويك أند هناك ..

سهام : مستحيل ياماما !! تعملى كده ازاي !؟

ثرىا هانم : انتى كمان زى أختك وأخوكى .. هانم
عليكى أبوكى .. هانم عليكى عادل .. هانم
عليكى خالك .. التلاته ماتوا فطيس

الهام : حنرج نعدد تانى !!

ثرىا هانم : اعمل آيه !! الدموع خلصت من عنيه ..
ماعنتش قادره أعيط عليهم .. ازيك ياسهام ..
وعامله آيه يابنتى مع نصار !؟

الهام : مش وقته الكلام ده ياماما ..
سكينه : (تدخل بالقهوة) القهوة ..

ثرىا هانم : اعملى لى أنا راخره فنجان .. واعملى
فنجان تانى للست سونه ..

الهام : وانا بالمره ياسكينه .. دماغى حتطق .. (وتخرج
علبة سجائرها) تاخدى سجاره ياسهام !؟

ثرىا هانم : أنتى مش قلتى بطلتيها ..

الهام : السجائر ماחדش يقدر يبطلها مادام عايش
عاشتنا ..

سونه : معذورة !! هو الى انتو فيه شويه !! أدينى
يابنتى سجاره أنا كمان ..

ثرىا هانم : علشان كده مابتخلفوش .. لا انتى
ولا هيه .. واسم النبى حارسها لو اتجوزت مش
حتخلف ..

الهام : ومين الى قال انى حاتجوز ؟!
سهام : أحسن لك يا الهام .. أوعى تتجوزى .. الجواز
بهدة وقله قيمه ..

ثرىا هانم : هو نصار لسه بيلعب بديله ؟!
سونه : كله من الفلوس الى فى ايديهم .. تعالوا
شوفوا حسنين .. أول ما اتجوزته كان زى القطة
المغمضة .. بعد ماجت له الفلوس .. بيلعب
بمناخيره ذاتها ..

ثرىا هانم : لاء يا اختى .. المرحوم ماكانش كده ..
الهام : بابا !!!

ثرىا هانم : آخرسى قطع لسانك ..
الهام : وانا قلت حاجه ...

سكينه : (بالقهوه) القهوه .. (وتشرع فى توزيعها
عليهم)

أحمد : (يدخل مسرعا) هه !! خلاص ارتحتم !! وكمان
بتشربوا سجاير !

ثرىا هانم : آدينى يا احمد يا ابنى .. سيجاره من سجايرك
الحاميه !!

أحمد : سيجاره ياماما !؟

ثرىا هانم : اشمعنى أنا الى مش حاشرب .. (ويشعلها لها)

أحمد : المعامى مش عاوز يتعبكم .. حيجيب الأوراق الى محتاجه أمضى علشان توقعوا عليها وانتو قاعدين مطرحكم ..

ثرىا هانم : مش بس أما نفهم أولا الى فيها !!

أحمد : حيشرح لكم كل حاجه .. شرح قانونى مفصل وكامل ..

سونه : وتصفوا الشركات !؟

أحمد : اتصفت خلاص .. من غير ماحد يسحب ولا مليم من نصيبه وحنكون بدلها شركات جديدة ..
بالأنصبه الجديده ..

سونه : يعنى مش حتغيروا حاجه ..

أحمد : مافيش أى تغيير .. الشركات زى ماهى بأسماءها القديمة وبنشاط مستمر . التغيير فى

الأنصبه بتاعتكم بس ..

سهام : ازاي ياأحمد !! اذا كان ذهب خد نصيبه !!

أحمد : خلصوني .. أنا ماليش ذنب فى كل اللي انتو
عملتوه ..

ثريا هانم : يعنى واحنا كنا عملناه لروحنا .. ماهو
علشانك وحتاخذ نصيبك من الثروة وانت حاطط
رجل على رجل ..

أحمد : أنا مش بتاع ثروات ..

سهام : طول عمرك بتاع ثورات ..

ثريا هانم : ثروات ولا ثورات ماتفرقش .. الكلمتين
حروفهم واحده .. المهم انه خدها على الطاير هو
والاسطى ذهب بتاعه ..

أحمد : ذهب يستحقها ..

ثريا هانم : (تقوم له) على آيه !! على قتل أبوك وأخوك
وخالك !!

أحمد : على خدماته لهم كلهم .. ذهب هو الوحيد اللي
كان بينفذ كل التعاقدات .. بصراحه .. لولا
ذهب كان بابا زمانه لسه استورجى زى ماكان ..
وحسنين بيه كان زمانه لسه بيبيع خضار ..

ثريا هانم : طب وجوز اختك نصار ...

أحمد : المقدم له وضع تانى .. يملك نص الشركات
وهو صاحب الفضل الأول والأخير على الشركا ..

سونه : حسنين بيقول ان هو اللي كان ماسك القاعدة ..
ثريا هانم : قاعدة آيه ياستى سونه !؟

أحمد : قاعدة صواريخ التصدير .. هو خلى بضاعة من
أى نوع فى أوروبا الا ماوردها لهم .. فى كل
أزمة تموين .. ومن كل بلد ومن كل صنف ومن
كل نوع ..

ثريا هانم : أصله كان خبير تصدير من أيام حرب
اليمن ..

الهام : وهما حكموا عليه بالسجن من شويه ..

ثريا هانم ماتقوليش كده على جوز آختك ..

سهام : خليها تقول ياماما .. ياريتيه ماكان هاجر
ولا كان هرب ..

أحمد : اللي حصل حصل وانتهى خلاص .. أجيب

المحامى !؟ الراجل ورقه جاهز على الامضاءات ..

سهام : أستنى يا أحمد ..

أحمد : فيه حاجه ياسهام !؟ مش معاكى التفويض !؟

سهام : نصار خلاص .. قطع صلته بيه .. وقطع
صلته بيكم ..

الهام : يعنى آيه فهمينا !!

سهام : اتفقنا على الطلاق .. واتطلقنا بالفعل ..
ثرىا هانم الكلب الجبان .. دا أبوكى اللى كان بيصرف
عليه وهو فى المدرسة الحربية .

سهام : أنا اللى طلبت منه الطلاق .. برغبتي ورضايا
وفى مقابل نص نصيبه وفى نظير دفع الربع الباقي
من كل أموال التلت شركات .. وعلشان كده راح
زيورخ ومستنى هناك تبعتوا له توكيل يصرف به
نصيبه

حسنين : (مقبلا من غرفة المكتب) هه !! جاهزين !!
سونه : تعالى الحق يا حسنين .. تعالى شوف اللى
جرى ..

أحمد : ماجراش حاجه ياستى .. كل واحد محتفظ
بحقه ومحتفظ بنصيبه .. سهام .. (يمسك
بيدها) تعالى معايا علشان تفهمى المحامى عن
الحجات دى كلها .. وهاتى معاكى أوراقك ..
ثرىا هانم : الندل الجبان ...

سونه : (وهو يتبع أحمد وسهام متجها لغرفة المعامى)
استنانى يا حسنين .. بعد أذنكم . أنا حاروح
معاهم .. كل حاجه مكتوبة باسمى .. ولا تكون
هربتها لبتاعة كباريه الهرم علشان تطلقنى أنا
كمان ..

حسنيين : اعقلى ياسونه .. الكلام ده مش وقته ..
وانا أقدر أستغنى عنك

سونه : الا بعد ماتكون جردتتى من فلوسى !! مش
كده !!

حسنيين : تعالى احضرى التصفية بنفسك ..

[ولا يبقى غير ثريا هانم والهام]

ثرىا هانم : الحقىنى يابنتى يا الهام .. مش قادره أحط
ايدى على دماغى .. امسكيها لحسن حتطق تفرقع
.. يادى الحوسة اللى احنا فيها .. دا هم أكثر من
هم الموت .. والنبي اللى ماتوا ارتاحم .. قال
وبيحسدوا اللى معاهم فلوس .. وبيقولوا
مليونيرات .. على أية !! على الهم اللى احنا فيه ..
وحوش الغابة ابتدوا ياكلوا بعض .. ولما حيشبعوا
.. حرمونا عضم للديابه ..

الهام : ياماما احنا حقنا ثابت ومحفوظ ومستحيل
يضيع ..

ثر يا هانم : مين يا اختى اللى حيحفظهولنا؟! أخوكى
أحمد !!

الهام : القانون ياماما ..

ثر يا هانم : القانون اللى طلع الاسطى ذهب براءه وهو
قاتل تلاته ...

سكينه : (تقبل من الباب الخارجى مندفة صارخه) ستى
هانم ...

ثر يا هانم : عاوزه أيه مننا انتى كمان؟!

سكينه : الاسطى ذهب

ثر يا هانم : ماله !! موت حد تانى !!

سكينه : لسه راجع من أوروبا وعاوز يقابلكم ..

ثر يا هانم : موت نصار فى أوروبا وجى يكمل علينا ..

خدونى على الأسانسير • طلعونى لأوضتى تانى

•• ماأقدرش أشوفه •• ماأقدرش أبص فى خلقتة

•• القاتل •• الوحش القاتل •• ايدك يا الهام ••

الهام : روحى عطليه دقيقتين على ما اطلع ماما
لأوضتها ..

ثرىا هانم : وآيه اللى جابه تانى .. (وهى تسير مستندة
الى يد ابنتها الهام) ماكان اتنيل وخفى وبعد عض
عنيننا .. من الليلة دى حارجع القرافه ..
حاعيش فى المدافن طوالى .. الميت أبقى من
الحى ..

الهام : على مهلك ياماما .. تعالى ارتاحى ونامى فى
السريـر .. وخدى لك مهدىء ..

ثرىا هانم : لاء .. خدونى القرافه .. أنا فرشت لى
أوضتين كاملين من أوض العمارات هناك

الهام : وتعيشى مع الأموات !؟

ثرىا هانم : لاهو انتو فاهمين القرافه مافيهاش الا
أموات .. دا فيها مليون حى .. هما اللى عايشين
خلوا للميتين حاجه .. وقليل ان ماخرجوا الأموات
من قبورهم وبنوا فوقها عمارات .. أنا معى
الأموات يابنتى .. ادفنونى هناك بالحيا ..

سكينه : (تدخل مرددة) اتفضل ياسعادة البيه ..
اتفضل ..

ثر يا هانم : يا خرابى ٠٠ يابت احنا لسه ماطلعناش ٠٠
جرى على الاسانسير يا الهام ٠٠

سكينه : ماتفضل يا بيه ٠٠ (ذلك ان الاسطى ذهب كان
قد دخل ثم عاد الى الخارج مسرعا)

ذهب : انا جى حالا ٠٠ نسيت الشنطه والأوراق فى
العربية ٠٠

ثر يا هانم : (قرب باب الاسانسير) سامعاها ٠٠ بتقوله
يا بيه وهو جى يخلص علينا ٠٠

الهام : خلينا فى حالنا ياماما ٠٠ وادخلى بقى ٠٠
(وتدفعه لتختفى وراءها)

أحمد : (لسكينه) ماما والهام فين !!؟

سكينه : طلّعوا فوق ٠٠ خايفين من الأسطى ذهب ٠٠
أحمد : ذهب فى أوروبا ٠٠

سكينه : لسه توك واصل يا استاذ أحمد ٠٠ جى من
المطار عليكم طوالى أهو جه أهه ٠٠

أحمد : الله ٠٠ دا صحيح ٠٠ حمد الله على السلامه ٠٠
ذهب : سهام هانم وصلت ٠٠

أحمد : ما بقلهاش نص ساعه ..

ذهب : الحمد لله ..

أحمد : احنا كنا فاهمين انك حتقعد هناك على طول ..
لازم نصار هو اللي بعتك علشان تلحق تصحح
الموقف ..

ذهب - فعلا .. هو اللي اضطرني أرجع .. مش عاوز
يكون له أى صلة بحد من مصر .. خلاص ..
هاجر هجره نهائيه ..

أحمد : عندك فكره عن اللي عمله معى سهام ..

ذهب : اتضح انه كان متجوز واحده ألمانيه ومخبى على
أختك .. خد الجنسية الألمانية .. وحيشغل على
نطاق دولى فى تجارة الأسلحه .. دخل شريك مع
جماعه سوريين وجماعه لبنانيين ..

أحمد : واسترد صفته العسكرية .. معلوم .. له حق
.. ماهى الحرب بقت فى كل بلد من بلادنا ..
ونص الميزانيات رايحه على الأسلحه ..

ذهب : يا أستاذ أحمد مانت عارفه كويس ..

أحمد : اللي أنا مش قادر أتصوره .. ازاي دا كله

حصل .. عملتوا الحاجات دى كلها امتى .. أنا
كنت نايم على ودانى ..

ذهب : كنت غرقان فى السياسه والثقافه والكتب
والمبادئ ..

أحمد : آمال كنت غاوزنى أسرق معاهم زى مانت
عملت ..

ذهب : أنا ماسرقتش .. كله بعرق جبينى .. وهما
الى كانوا بيدفعونى .. حد يلاقى فلوس قدامه
بالآلافات ويرفصها برجليه ..

أحمد : انت خلاص انتهيت بالنسبه لى يادهب بيه ..
مابقتش الاسطى ذهب الى كنت أعرفه وأنا لسه
صغير وعایش فى الأحلام ..

ذهب : مافيش داعى للكلام ده ياأستاذ أحمد .. المهم
.. وصلتوا لأيه ..

أحمد : حسب مشورة المحامى .. حيصفوا الشركات
القديمة ويكونوا غيرها بعد مايفيروا الأنصبه ..
والمحامى مقدم لهم اقتراح جديد .. عاوزهم
يفتحوا بنك ..

ذهب : بنك

أحمد : بيقول لهم لازم نجارى التطور ومادام دخلنا
فى مرحلة البنوك .. يفتحوا بنك .

ذهب : الراجل دا عقر .. أحسن محامى انفتاح ..

حسنين : (يقبل) ياأستاذ أحمد أنت كل شويه تسيبنا
.. الله .. سلام قولنا من رب رحيم !! الاسطى

ذهب !! جيت ازاي؟!

ذهب : بالطياره ..

أحمد : لسه واصل يا حسنين بيه ..

حسنين : جيت فى وقتك .. ألف حمد الله على السلامه
.. أمال الست الوالده فى ..

أحمد : رجعت طلعت فوق ..

حسنين : احنا ماصدقنا نزلناها .. أختك سهام هانم
رجعت تعيط تانى .. سيادة المقدم ممضيها على
العجب ..

ذهب : وكان عاوز يمضينى أنا راخر .. ماهو دا اللى
جابنى .. قلت الحق التسوية قبل ما يضيع اللى
جوه زى ماضاع اللى بره ..
(هنا تدخل سهام مولوله باكيه)

سهام : بقى كده يانصار .. تستغلنى وتجردنى من كل
حاجه .. وأنا آيه خلانى مضيت له ..

حسنين : ياهانم .. انتى مش قرىتى الورق قبل
ماتمضيه .. آمال ان ماكنتيش محاميه ومعاكى
حقوق !!

أحمد : ما بيعلموهمش حاجه فى الجامعه .. كله حسب
المجموع وسهام أختى طول عمرها زوجه وفيه ..
سهام : عمرى ماراجعته فى ورقه .. (وتضع رأسها
بين كفيها وتبكى) .

أحمد : أصلها كمان متخرجة قبل الانفتاح ومادرسشى
قوانين الانفتاح ..

سونه : (تقبل) المحامى ورانى ورقها .. سابها عريانه
ملط .. خلاها اتنازلت حتى عن النفقه ..
حسنين .. أوعى يا حسنين ..

حسنين : أنا مضيتك على حاجه !؟

سونه : والتوكيل اللى بتنقل به الفلوس من بنك لبنك .
.. دا أنت النهارده زى ماقلت .. صبحت فرطتنى
على خمس بنوك .. وحيطلع فى الآخر انك أنت
اللى فاتح لها الكباريه من فلوسى ..

حسنين : هي مين ؟!

سونه : الرقاصه بتاعة شارع الهرم ..

ذهب : آمال فخرى .. اتطمنى ياهانم .. فلست
وقفلت الكباريه واتجوزت دكتور عظام ..

سونه : حتاكل لحمه وتشرب دمه وتقرقش عضامه ..

ذهب : مضبوط يامدام .. هو دا اللى دايمًا يحصل ..

سونه : ياخرابى !! مين !! الاسطى ذهب !! هو أنت
اللى بترد عليه !! لحقت ترجع من أوروبا ..
خلصت عملية زيورخ ..

ذهب - انتهت والحمد لله ..

سونه : خد أيدي يا حسنين .. خلص عليه هناك ..
وحيندار علينا احنا هنا ..

ذهب : المدام بتقول أيه ؟!

سونه : مابقولش حاجه ياسى الاسطى ذهب بيه ..
بس احزفنى من القايمه .. أنا مش فيهم . أنا
مش منهم ..

أحمد : المدام مالها يا حسنين بيه ..

حسنين : عندها حاله عصبية .. مانتش شايفينها
بترت عشر .

سونه : أيوه عندي العصبى ..
أحمد : (اذ يرى المحامى مقبلا) تعالى الحقنا يامتر ..
المحامى : اتفضللى أقعدى ياهانم .. اتفضلوا أقعدوا
جميعا .. هدوا أعصابكم .. مافيش داعى لأى
انزعاج أو خوف .. ياأستاذة سهام .. خليكى
معانا .. موقفنا الاقصادى سليم بالنسبة لكل
شريك .. اتفضلم .. كل واحد واقف يقعد على
أقرب كرسى يقابله .

حسنين : أمال فىن العقود الجديدة اللى جهزناها ؟!
المحامى : مالهاش داعى .. انسوها مؤقتا .. ياهوانم
.. يابهوات .. وانا حاقولها بكل صراحه ..
اذا كنتم مش واثقين منى كمستشاركم القانونى
.. أنا مستعد أنسحب وعينوا غيرى .. جاوبونى
.. قلتوا أيه ؟! قررتوا أيه ؟!

أحمد : ودا وقته ياأستاذ بركات .. عاوز تسيبنا
واحنا بنفرق !!
المحامى : مش أنا اللى غرقتكم ..

سونه : يعنى احنا غرقانين !!؟

حسنين : ماترد ياأستاذ . . .

دهب : ماتنطق يامتر .

المحامى : أنا لو كنت حاوى ماأقدرش العب لعبتى امام

أفعالكم وتصرفاتكم ومفاجأتكم . . أنا مش شاعر

بأى تجاوب من ناحيتكم معايا . .

أحمد : معلىش ياأستاذ بركات . .

دهب : استحملنا أرجوك . .

حسنين : احنا مستعدين نعمل اللى انت تطلبه . .

المحامى : موقفنا الاقتصادى زى ماقلت لكم فى الاول

. . سليم وفى منتهى السلامه . . لكن جدت

أوضاع بعد وصول سهام هانم بالأوراق اللى معاها

. . أحدثت ربكه . .

سونه : والاسطى دهب بيه !!؟

المحامى : وانت كمان راجع معاك أوراق . .

دهب : أبدا . . مافيش أكثر من اللى يثبت حقوقى هنا

فى الداخلى بالنسبة لكم أما عن معاملاتى الخاصة

مع سيادة المقدم نصار . . فتعتبر منتهيه . .

المحامى : فى الحاله دى ٠٠ يبقى موقفنا سليم وواضح
كل الوضوح ولا غبار عليه ٠٠ نبداً أولاً بانتهاء
الوضع بعد وقوع الوفاء ٠٠

سونه : هو حد مات تانى ٠٠

سهام : عاوزه أكثر م التلاته اللي راحوا فى فمضة
عين ٠٠

أحمد : من فضلكم ياهوانم ٠٠ كمل يامتر بركات ٠٠
ولا آيه يادهب ٠٠

دهب : أنا اهه ٠٠ (ويربع يديه) قاعد وساكت ومفتح
ودانى ياأستاذ أحمد ٠٠ اتفضل يامتر ٠٠

المحامى : بعد وقوع الحادث الأليم ٠٠ كنا صفينا الموقف
بمصفاة القانون تصفية كاملة ٠٠

دهب : عظيم ٠٠

المحامى : وارجع واقول مكررا ٠٠ صفينا الموقف تصفية
نظيفة فيما عدا بعض المتعلقات التى لا تزال
لاصقه بالتصفية ٠٠

سونه : زى فتل المكرونة الاسباكتى لما تلزق فى
المصفه ٠٠

- المحامى : على كل حال اللواصق مقدور عليها ..
- سونه : علمتها للطباخ بتاعنا .. قلت له حطها تحت
الحنفيه ونزل عليها الميه ..
- دهب : يامدام احنا مش قاعدين فى مطبخ ..
- سونه : حاضر يا اسطى دهب بيه ..
- حسنين : سيبى المحامى يسبكها ..
- المحامى : أنا مش باطبخ طبخه .. أنا راجل قانونى
وباطبق القانون .. نسا وروحا ..
- حسنين : وضع لنا يا أستاذ ...
- المحامى : أوضح من كده يا حسنين بيه !!
- دهب : عاوزين نعرف آيه المطلوب واحنا نعمله ..
- المحامى : أنا طالب مهله شهرين .. أدرس فيها الأوراق
الجديدة بتاعت الاستاذة سهام هانم .. وارجع
المستندات الخاصة بالسيد الاسطى دهب ..
- أحمد : كأن حضرتك عدلت عن فكرة البنك ..
- المحامى : مشروع البنك مؤجل .. المجال قدامنا واسع
.. والمرحلة البنكيه مازالت وستظل مستمره ..

وزى مايقولوا البنوك هيه العمود الفقرى
للافتاح ..

سونه : هيه البلد ناقصه بنوك .. دا البنوك بقت أكثر
من البوتيكات ..

المحامى : ياهانم من فضلك ..

حسنين : انتى بتفهى فى الاقتصاد كمان ..

سونه : ويعنى انتو اللى كنتوا بتفهموا فيه لما عملتوا
الملايين دى كلها ..

حسنين : ياوليه بلاش فضايح قدام الناس .. ملايين
آيه اللى عملناها ..

ذهب : دا ناقص تبلغ عننا المدعى الاشتراكى ..

أحمد : خلونا فى موضوعنا .. كمل يامتر ..

المحامى : ماعدش عندى كلام .. أنا طالب مهله
شهرين .. واللى موافق يرفع صباعه ..

سهام : جرى آيه ياأستاذ .. هو احنا فى روضة
أطفال ..

المحامى : ياهانم احنا كونا روحنا فى ظل سيادة القانون
لاننا تمسكنا بالقانون . النهارده احنا بنعيش فى

ظل الديموقراطيه .. ولازم نتمسك بالديموقراطية
.. أنا طالب رأى الأغلبيه ..

حسنين : واحنا كلنا موافقين ..

سونه : من غير ماتدخلنا فى السياسه ..

المحامى : مافيش أصوات ناقصه !؟

سهام : ماما .. والهام أختى ..

أحمد : واهم خارجين أهم من الاسانسير ..

سهام : (تجرى اليهما) اتفضللى ياماما .. جيتى فى
وقتك انتى والهام .

ثرىا هانم : وآيه اللمه اللى انتو عاملينها دى كلها ..
وكمان جايبينلى الاسطى دهب .. الوحش
القاتل ..

أحمد : مش أصول ياماما ...

ثرىا هانم : الهام .. أنا خارجه طوالى .. الحقونى
بالشنتط حاخذ العربيه .

سهام : رايحه فين !!؟

ثرىا هانم : القرافه ياحببىتى . . ماعدش ليه عيشه
معاكم . . مش حاستنى هنا دقيقه .

سهام : وتسيبىنى لوحدى ياماما !؟

ثرىا هانم : اذا عزتىنى ابقى حصلينى . . انا رايحه
لابوكى واخوكى وخالك . .

أحمد : لحظه واحده ياماما . .

ثرىا هانم : عاوزين منى أيه !؟

أحمد : الاستاذ المحامى طالب تأجيل التصفيه
شهرين . .

ثرىا هانم : يأجلها زى ماهو عاوز . .

المحامى : يعنى سيادتك موافقه !؟

ثرىا هانم : اعملوا اللى تعملوه . . بس ابعدوا عنى . .

حيموتكوا واحد واحد . . ومش حياجل التصفيه .

. . انا بانجى نفسى منه . .

سهام : وانتى يا الهام . .

ثرىا هانم : حاخذها معايا . . هيه الوحيده اللى

فضلالى من التركه كلها . .

الهام : ياماما . . انا قلت لك . . حاوصلك وارجع .

أحمد : موافقه يا الهام على تأجيل التصفيه !؟
المحامى : من الأفضل ديموقراطيا الحصول على
الاجماع ..

أحمد : الهام ..

سهام : قولى موافقه ..

الهام : موافقه ..

دهب : بقى أنا وحش قاتل ياستى هانم !؟

ثريا هانم : ابعد عنى .. ابعده عنى حىقتلنى ..
(وتسرع نحو الخروج) أنا عأوزه أموت طبيعى ..
رايعه القرافه علشان تبقى رجلى والقبر ..
(وتمد رجلها للنزول على السلم)

الهام : حاسبى ياماما .. رجلك والسلم ..
حتقى ..

حسنين : لاحول ولاقوة الا بالله ... مع انها ست
عاقله ..

دهب : ميزان القوة فى العيله كلها ..

المحامى : مسكينه .. مسكينه ...

سهام : هي ماما جرى لها آيه يا أحمد !؟
أحمد : مش قادره تتحمل الصدمه . . . خلاص يامتر
. . حناجلها شهرين . .
المحامى : (رافعا يده صارخا) تأجيلا ديموقراطيا . .
وبالاجماع المطلق .

وتنزل الستار على نهاية الفصل الأول

الفصل الثاني

المنظر :

الصالة التي تتوسط الغرفتين اللتين قامت ثريا هانم
بيناهما مؤخرا لتسكن فيهما داخل مدفن العائلة .. وهي
مفروشة بانترية قديم نوعا وعدة مقاعد وكنبة بلدى ..
توسطها مائدة حولها ايضا بعض المقاعد مغطاة بغطاء
اخضر .. وهناك نلاجة ايديال جديدة فى احدى الاركان
وباب يؤدي الى حوش المدفن يقابله باب الدخول وكلاهما
لا يرى لوقوعهما خلف نتوءات الحوائط الحديثة البناء
والدهان .. وهناك اكثر من برواز معلق على الحائط ..
ثلاث منها بها صور الزوج والابن والخال الراحلين
وبقيتها عبارة عن آيات قرآنية ابرزها برواز « ادخلوها
بسلام آمنين » وحائط الوسط تشغل معظم مساحته
نافذة المنيوم يرى من خلال زجاجها شجرة تتوسط
شواهد القبور .. ومن بعدها سور يوحى بما خلفه باننا
وسط الجبانات ..

الست ام متولى جالسة على بوف او شلثة بينما
ثريا هانم متربمة فوق الكنبة البلدى فى جلسة مائلة
اذ انها تسند زراعها على المساند وربما كانت تدخن .

أم متولى : بقى ياست هانم حد يسيب فيلا بأسانسير
ويجى يسكن فى المقابر !!!

ثرىا هانم : قولى لروحك يام متولى .. أنتو بقى لكم
هنا كام سنه !؟

أم متولى : من يوم ما وقعت الدار فوق دماغنا واحنا فى
السيدة عيشه .. لقينا الكل زحف على المقابر
قلنا نزحف معاهم .. كان أبو زكى شارى حوش
جنب مدفن أبوه .. قلنا نبنيه بيت ويبقى اللي
يموت يندفن مع اللي ماتوا .. زحمة الآخره أخف
من زحمة الدنيا ...

ثرىا هانم : طب وبتلومى عليه ليه بقى يام متولى !!

أم متولى : آيه .. أش جاب لجاب يامدام !!

ثرىا هانم : يااختى بطلى الكلمة دى .. بلا مدام
بلا نيله ..

أم متولى : كنا مضطرين .. حبوا يقعدونا فى خيم
الايواء .. أبو زكى حلف مايدخلها ولا يتطاطى
براسه تحتها .. جينا فى الاول زى حضرتك
ماعملتى كده وبنينا أوضتين .. لغاية ماربنا
فرجها وقدرنا على البيت اللي جنبكم .

ثريا هانم : هو جوزك صنعته آيه ؟!

أم متولى : بتاع قيشانى .. كان سابنا وسافر قعد سنتين فى الكويتيه وتلاته فى السعوديه .

ثريا هانم : وطبعاً رجع بثروه من هناك ؟!

أم متولى : القرشين اللى عملهم راحوا فى البيت ..
وشويه عدد ومكن جابهم معاه يشتغل بيهم ..
وبعدا فتح مصنع بلاط ..

ثريا هانم : يعنى هو دلوقت صاحب مصنع بلاط ؟!
أم متولى : مش لوحده .. شركه مع ابن عمته الاسطى
ذهب ..

ثريا هانم : (تفزع) بتقولى مين !! الاسطى مين !!

أم متولى : الاسطى ذهب ابن عمته .. عقبال الحبايب ..
كان وهو فى الدرب الاحمر بيسوق عربيات ..
كارو .. وبعدين اشترى عربيه نقل ..
والنهارده سلطان زمانه .. عنده تلت شركات ..
اتنين هنا فى مصر .. وواحد فى أوروبا ..

ثريا هانم : واسمه ذهب !!!

أم متولى : ذهب وبيشر ذهب ...

ثريا هانم : وطبعاً بييجى يزوركم هنا مادام ابن
عمته ..

أم متولى : من يوم ما ضربت معاه فى السما .. ماشفناش
وشه .. لكن أبو متولى بيقابله كتير .. ماهم
شركه فى مصنع الطوب ..

ثريا هانم : ومايرحلوش الشركات الثانيه !؟

أم متولى : علمى علمك .. ما بيجبليش سيره عن حاجه
.. لكن يوم ما بيقابله بييجى طائر من فوق الأرض
.. أصلك ما تعرفيشن الاسطى ذهب بقى النهارده
أيه ..

ثريا هانم : عارفه .. عارفه كل حاجه ..

أم متولى : أبو متولى بيقول أنه حيصفى الشركات
وحيفتح لوكانده سياحه فى الزمالك لوحده ..
من غير شركه .. وكم ان حيبنى عمارتين فوق
الأرض اللى اشتراها على كورنيش المعادى ..

ثريا هانم : أرض المعادى !! هيه بقت ملكه لوحده !!

أم متولى : آمال !! ماهو علشان كده راح يقابل شريكه
الكبير اللى عايش فى أوروبا ..

- ثريا هانم : راح يااختى ورجع تانى بالسلامه ..
- أم متولى : أبو زكى ماقاليش على رجوعه ..
- ثريا هانم : يمكن يكون سافر تانى ..
- أم متولى : لكى حق .. أصله مابيقعدش فى حتة ..
- مالوش بيت .. بيقعد فى اللوكاندات الكبيرة ..
- ثريا هانم : هو مش متجوز!؟
- أم متولى : ولا مخلف ولا عنده ولاد ..
- ثريا هانم : (على سير الاولاد) آه يانارى من الاولاد ..
- رابع شهر وانا هنا .. الهام سابتنى وسهام
زارتنى مره واحده .. وأحمد ماشفتش وشه .
- أم متولى : وماتقوليش ليه البت المنيله سكينه اللى كنتى
جايبهاها معاكى .. دى ماقعدتش أسبوع ..
- ثريا هانم : هيه صحيح سافرت مع السمكرى اللى جه
اتجوزها ..
- أم متولى : غطست فى بير .. لكن صاحبتهأ نواره جت
عندى هنا امبارح وبتقول انها شافتها فى الزمالك
بتشتغل عند جماعه عرب .. ويمكن تتجوز واحد
منهم

ثریا هانم - صدقیها الی زی دی قادره وتعملها ..

أم متولی : یاستی هانم احنا کلنا فی خدمتک .

ثریا هانم : لاء یام متولی .. أنا مش طایقه وجودی

هنا .. وحياتك تاخدينی لیهم .. حاروح

استأذن منهم علشان آسیبهم .. أما أشوف

حیقولوا آیه ..

أم متولی : الادنتی صحیح بتکلمیهم وبردوا علیکی من

جوه القبور ..

ثریا هانم : وصوتهم بیرن فی ودانی رنة الادان ..

أم متولی : ازای بس یاناس !! دا احنا بقی لنا عمر

ساکنین فی وسط ملیون میت .. ماسمعناش لحد

منهم حس !! وعلی رأی أبو متولی حنسمع ازای

واحنا ماشیین فوق عضامهم !!

ثریا هانم : (وتقوم) خدینی بس لیهم فی مقابرهم ..

أم متولی : واصرف الأسواق الی باعتینه بأکل مالی

العربیة !!

ثریا هانم : حظیه زی کل مره فی التلاجه .. أنا

حاروح لهم الأول .. خدینی یام متولی

أزورهم ..

أم متولى : هاتى معاكى مفتاح بوابه السور علشان
ندخل لهم المدفن ..

ثرىا هانم : آهه .. المفتاح آهه .. معايا آهه ..
(وتخرج المفتاح .. ثم تخرجان معا)

(بعد لحظة .. يدخل أحمد ومعه السائق حسين)

أحمد : شوفها كده فى الأوضه التانيه يا حسين ..

حسين : لاء يا أستاذ أحمد .. أنا لسه شايفها داخله
المدافن مع واحده ست .

سهام : (تدخل) آيه يا أحمد !! ماما وافقت ؟!

أحمد : مش لاقينها ..

الهام : لتكون عملتها ودفنت روحها بالحيا زى ماكانت
بتقول ..

سهام : بلاش تخريف يا الهام .. ماما تموت روحها !!

انتى ماتعرفيهاش زى ماانا أعرفها .. مع انك

عشتى معاها أكثر منى ..

أحمد : احنا مش جاين نتخانق مع بعض .. روح

يا اسطى حسين هاتها من المقابر .

الهام : مش حتتنقل من هنا الا أما ناخذها معانا ..

سهام : بالذوق أو بالمافيه ..

أحمد : بس أما تيجي .. أنا خلاص .. زهقت
وعاوز أخلص .. زهقت من عيشتي وعيشتكم ..
عمرى ماكنت أتصور ان احنا حنوصل للدرجة
دى !!

الهام : طول عمرك سوداوى ومتشائم ..

أحمد : يعنى ماتطقيش علم النفس بتاعك الا عليه ..
سهام : ماما جت أهه .. (وتدخل الام من الباب المؤدى
للمقابر)

أحمد : أهلا ياماما .. وحشتينا ..

ثرىا هانم : والله سلامات ياضىنى قلبى • بقى ماتجيش
تشوف أمك ولو مره !!

الهام : ياماما احنا كلنا مش قادرين نعيش من غيرك
وماقدرش نستغنى عنك [٥٧]

سهام : بصراحه جايبين ناخذك بالقوه ..

ثرىا هانم : مالهاش داعى •

الهام : حتيجى معنا ولا لاء ...

ثريا هانم : مش هان عليكم تروحوا تزوروا أبوكم
واخوكم وخالكم وتقروا على روحهم الفاتحه!؟

أحمد : آريناها واحنا جاين فى السكه .. واحنا
بكره حنقابلهم فى الآخره ..

ثريا هانم : انت فاهم انهم حيدخلوا النار معاك ..
هما خدوا حاجه من الفلوس اللى سابوها .. دول
ماتوا شهدا ..

الهام : ربنا يرحمنا ويرحمهم ويدخلنا كلنا الجنه ..
اعملى حسابك حتىجى معانا .. يعنى حتىجى
معانا ..

سهام : مش معقول ياماما تعيشى فى المقابر لآخر
العمر ..

الهام : حد فى الدنيا يعيش فى المقابر!؟

ثريا هانم : روحوا لفوا بعريياتكم وعدوهم .. مليون
بنى آدم .. أكثر من الميتين ألف مليون اللى
مدفونين فيها ..

سهام : دا مش مبرر ..

ثريا هانم : وعيشتهم أحسن من عيشتكم وعشرتهم
أحسن من عشرتكم .

الهام : دا مش منطق ياماما ..

ثر يا هانم : ماتكلمنيش بالفلسفة بتاعتك ..

سهام : (تمسك بها) حتيجي معانا .. يعني حتيجي معانا ..

الهام : والنبي ياماما .. علشان خاطري (تشبث بها هي الأخرى)

ثر يا هانم : عاوزاني أحضر فرحك ..

أحمد : مين اللي قال لك عليه !؟

ثر يا هانم : هما يا ابني يا حبيبي ...

الهام : هما مين ياماما !؟

ثر يا هانم : الاموات اللي أنا عايشه معاهم .. وقالولي

كمان انكم صفيتم التركة وكل واحد خد نصيبه

أحمد : ما احنا بعتنالك الاوراق وصدقتي على

نصيبك ..

ثر يا هانم : والنبي ماقرتهم ولا بصيت فيهم ..

واسألوا وكيل المعامي اللي جابهم ..

الهام : أمال عرفتي من مين ان أنا اتخطبت

وحا تجوز ..

ثرىا هانم : من ابوكى واخوكى وخالك .. هما نفسهم
انك انت كمان تتجوز .

سهام : وماجبوش سيرتى ياماما !؟

أحمد : بلاش تخريف ياسهام .. ماتصدقيش كلامها ..

الهام : انتى تايهه عن ماما ..

أحمد : المهم .. حتىجى معانا ..

الهام : وحياءة بابا .. وحياءة عادل .. وحياءة خالى ..

(وتمسك بذراعيها راجية)

سهام : وعلشان خاطرى .. أنا عايشه لوحدى ..

ثرىا هانم : خلاص حاجى ..

سهام : صحيح ..

ثرىا هانم : لسه قايلينلى حالا .. روحى معاهم وأمرك

.. لله ..

سهام : أنا مش مصدقه الكلام ده !!

أحمد : كلام فارغ طبعا ..

ثرىا هانم : حديث الروح يا حبيبى .. مش أحسن من

الكلام اللى كنت بتقراه فى الكتب وتيجى تسمعه

علينا .. الاستغلال الاقتصادى والاستثمار

الرأسمالى ٠٠ والطبقات الكادحه والانفتاح
الاحتكارى ٠٠

الهام : ماخلص ياماما ٠٠ احمد بطل الكلام ده ٠٠
ثرىا هانم : طبعا ٠٠ طلعت بكام يا حبيبى ؟ ٠ نصيبه
كام بعد التصفيه ؟

الهام : مليون ونص ٠٠٠

ثرىا هانم : وأنتى يا الهام ٠٠٠

الهام : تلت تربع مليون ٠٠٠

سهام : وعريسها أبوه عنده عشرين مليون ٠٠

ثرىا هانم : ونصيبك أنتى يا حبيبتى !؟

الهام : اللص الحرامى مضاهها على نفقة شهرىه قبل

مايطلقها وفهمها انه تنازل لها عن نصيبه ٠٠

واتضح انه كان ساحبه من سويسرا ٠٠

احمد : وخذه يتاجر به فى الاسلحه ٠٠

ثرىا هانم : طب ونصيبك من أبوكى !؟

سهام : ياماما احنا صفيانا الكلام ده كله مع بعض

وانتهينا ٠٠

ثرىا هانم : وطبعا أنا ماطلعتش بحاجه ؟

احمد - نصيبك الشرعى ٠٠

ثريا هانم : ودا يطلع قد آيه ؟!

أحمد : نص مليون . . .

ثريا هانم : بس !!

سهام : مش محتاجين فلوس . . المهم ترجعى تعيشى
معانا . .

رأفت : (يدخل مندفعاً) هه . . انشا الله تكون
واقفت . .

ثريا هانم : (حين تراه) مين دا ياولاد !!

الهام : خطيبى . . رأفت سعفان . .

سهام : من أكبر عائلات بورسعيد . .

رأفت : (ينحنى) ليه الشرف ياهانم . .

ثريا هانم : من بتوع المنطقه الحره . .

الهام : ماتخدش بالك يارأفت من كلامها . .

رأفت : دا انا اتشرفت . . وسعدت . . ليه ياتانت
تعملى فى نفسك كده ؟

الهام : خلاص انتهت يارأفت . . ماما واقفت وحترجع
معانا الفيلا . .

ثريا هانم : بس على شرط . . .

سهام : اللى تأمرى بيه ..

أم متولى : (تقبل لاهثة) ستى هانم .. الحقى ياست
هانم

ثرىا هانم : سمعتى صوتهم .. حد منهم كلمك .. أنا
سايباكى جنب مقبرة أخويا .. مافيش غير خالكو
سليمان .. أصله يلوف على آى واحده ولو كان
جوا القبر ..

أم متولى : أنا ياهانم مااستنيتش بعدك دقيقه وقفلت
المدفن طوالى .. لامؤاخذه يابهوات .. لامؤاخذه
ياهوانم .. الست مامتكم هانم نخبطتنى ..

أحمد : حصل حاجه ياست !؟

أم متولى : لأول مره يعملها فى حياته .. جالنا البيت
يسأل عن المدافن بتاعتكم ..

أحمد : هو مين !؟

أم متولى : الاسطى ذهب يابيه ...

ثرىا هانم : جى يقتلنى .. فاكر انى لوحدى وجاى
يقتلنى ..

رأفت : أيه الحكايه ياأستاذ أحمد ..

أحمد : ماتاخدش بالك يارأفت .. فين الاسطى
.. دهب ..

أم متولى : على الباب . أنا ماكنتش فاكراه ان حد منكم
هنا .. قلت له خليك لما استأذن لك الهانم فى
الدخول ..

أحمد : قولى له يتفضل .. خليه يجى ...

ثرىا هانم : جايبينه وراكم علشان يموتنى !! لكن
حيموتنى على آيه !! دا بقى أغنى منكم كلكم ..
مش كده يأم متولى .. ملك ملوك الانفتاح ..
واخده من الناحيتين .. مع اللى اغتنوا ومع اللى
عاوزين يفتنوا . الكادحين بتوعك

أم متولى : يجى ياست هانم ؟

ثرىا هانم : وحد بعد النهارده حيقدر يقول له لاء ..
دا بكره يسموه الاسطى الماظ .

رأفت : مين الاسطى دهب دا ياالهام ؟!
(وتخرج أم متولى)

الهام : بعدين أفهمك يارأفت ..

ثرىا هانم : من غير ماتفهميه .. أول مايشوفه حيمعرفه

•• تلاقية غارز في المناطق الحره •• وفي كل

المناطق •• ماخلاش منطقته ••

رافت : ياتانت انتى عقليه اقتصاديه هايله ••

ثرىا هانم : الحال من بعضه ياابنى •• ماانا متربيه

زيك فى الشركات •• البلد كلها ماىقت منطقته

حره ياحبيبى •••

(والآن يدخل الاسطى ذهب)

ذهب : السلام عليكم ورحمة الله وبركاته •••

الهام : امسكى كتف ماما ياسهام •••

ثرىا هانم : أوعى كتفى •• وعليكم السلام يادهب

بيه ياابو الذهب ••

رافت : آه •• عرفت •••

ثرىا هانم : مش قلت لك أول ماتشوفه حتعرفه ••

رافت : حضرتك من عيلة أبو الذهب •• جدك محمد

بك أبو الذهب •• كان من أعظم رجالات مصر ••

(ويمد له يده)

ذهب : أشكرك (بعد أن يسلم عليه) أما أسلم أولا ••

أهلا ياأستاذ أحمد •• سلامات ياآنسه الهام ••

مرحب يا ستنا سهام .. أيدك يا ستى هانم ..
أيدك أبوسها ..

أم متولى : (تشجعها) مدى له ايدك يبوسها ..

ثريا هانم : هو انا بقيت خوجايه يام متولى !؟

دهب : واحنا جالنا من الخواجات أيه !؟

ثريا هانم : جالك منهم العربيات والكميونات ..
وقطع الفيار .. وجالك منهم اللحمه والجبنه
والخشب والصابون وكل المستوردات الى كنتوا
بتتاجرا فيها ..

أم متولى : أدى له ياهانم ايدك .. الراجل مادد أيدته ..
دهب : (اذ يراها ممتنعه يتراجع فى انحناء) تحياتى
وتشكراتى ..

رأفت : تشكراتى دى انت وارثها من جدودك ..
تمام .. سليل محمد بك أبو الذهب ..
الهام : بس يارأفت ..

ثريا هانم : أوعى تكون زعلت من كلامى يا اسطى
دهب !!

دهب : ياهانم .. دا أنا سعيد بكلامك .. لكن يهمنى
أقول لك ان المرحله دى انتهت ..

رأفت : مرحلة أيه ؟!

ذهب : اللى اتكلمت عنها ثريا هانم .. الانفتاح
الاستهلاكي .. مرحلته خلصت وانتهت .. احنا
النهارده تحولنا الى الانفتاح الانتاجي ..

ثريا هانم : مصانع الطوب ولوكاندات السياحه ؟!
ذهب : حضرتك !!

ثريا هانم : عارفه كل مشروعاتك الجديدة ياسليل
الأكابر .. جدك محمد بك أبو الذهب .. لو كان
عايش النهارده .. كان هو اللى حيدخل
التكنولوجيا فى البلد ..

رأفت : بالفعل .. محمد بك أبو الذهب كان من أكثر
الحكام فى تطوره العقلى ونظرته المصريه .. أنا
أصلى قرئت عن حياته ..

الهام : جرى لك أيه انت كمان يارأفت .. انت مش
عارف انها بتتريق ..

رأفت : بالعكس ماما بتتكلم جد .. مشروعاتنا كلها
وأبو الذهب بك يقدر يقول لكم .. كل مشروعاتنا
الجديده قائمه على ادخال التكنولوجيا ..

سهام : وانتي ياماما مين بيقول لك الكلام ده كله ؟!

ثر يا هانم : الناس اللي بيكلموني ...

أم متولى : مش أنا ياست هانم ..

سهام : وحد اتكلم عليكى ...

ثر يا هانم : آمال أنا جايه هنا ليه وبقى لى أربع شهر

عائشه جنبهم .. مش علشان أعرف منهم

أحوالكم ..

دهب : وجابولك سيرتى ياستى هانم ؟!

ثر يا هانم : وقالولى انت جى ليه كمان !!

دهب : أنا جى أسلم عليكى وأرحب بيكى واحبيكى

واحط نفسى تحت أمرك وفى خدمتك .. هو أنا

ممكن أنسى فضلكم عليه .. خصوصا فضلك انت

يا أستاذى ..

أحمد : أنا .. أنا ماليش أى فضل عليك يا اسطى

دهب .. انت كنت مؤهل لها من البدايه .. ومعك

حق .. عاوز توصل وعرفت وقدرت توصل ..

دهب : ماكانش قدامى طريق تانى يا أستاذ أحمد ..

أحمد : أنا اللي غلطان .. كانت رؤيتى محدوده

ونظرتى قصيره .. ولذلك انخدعت فى حقيقة
التطور ..

سهام : آيه الالفاز الى انت بتتكلم بيها دى
يا أحمد ؟!

ثرىا هانم : هو بيتكلم على أيام ماكان ذهب من
الكادحين بتوعه .. قبل مايدخل الانفتاح مع
أبوكى ..

ذهب : الله يرحمه .. الله يرحمه ..

أحمد : خلصونا بقى .. حنفضل واقفين كده ..
انتى مش وافقتى ترجعى معانا ياماما ..

ثرىا هانم : ارجع مع مين فيكم ؟!

سهام : معانا كلنا ...

ثرىا هانم : لاء .. انا حارجع مع نفسى ..

الهام : ازاي ياماما ؟!

ثرىا هانم : أنتى مش اتخطبتى وحتتجوزى وتروحي
مع عريسك ؟

رافت : لكن حنكون دايمًا معاكى ياتانت ..

ثرىا هانم : ماايبش بيتى ومطرحى ..

أحمد : ابقى اقعدى معايا . . .

ثرىا هانم : وماقعدشى الا معاك انت يا أحمد !!

سهام : طب اقعدى معانا احنا

الهام : ماهو طبعا ياسهام . هى ماما كانت حتسيبك
لوحذك !؟

ذهب واحنا كمان لايمكن نسيبها لوحدها . . .

أحمد : انتو مين يا أسطى ذهب ؟

ثرىا هانم : مانت لسه قايل له بلسانك يا أبو رؤيه

محدودة آمال هو جى يقابلنى هنا ليه !؟ ماتقوليلهم

ياسهام بصراحه . . خدها بعد ما استوفت العده . .

الهام : عده أيه ياماما !؟ !!

ثرىا هانم : بكره تعرفيها لما تتطلقى زيها وترجمى

تتجوزى تانى . .

سهام : بصراحه . . أبو الذهب طلب ايدى وانا

حاجتجوزه . . وهو جى علشان ياخذ موافقة ماما

بالفعل . . .

أحمد : بقى كده يا أسطى ذهب . . وازاى ماتقوليش

. . وانتى كمان ياسهام . . انتو ناسيين ان أنا

راجل . .

ثريا هانم : انت راجل العيله .. لكن انا كبيرة العيله
ياحبيبي ..

أحمد : طبعا ياماما .. انتى على عينا وراسنا ..
ذهب : انا غلطت فى حاجه !؟

ثريا هانم : عداك العيب يا ابن الاصول .. مش انت
ذهب وسليل أبو الذهب .. وكلك ذهب فى ذهب
أأقدم واثبت واغلى عمله .

رأفت : مش صحيح ياتانت .. الدولار أقوى وأثبت

ثريا هانم : فى مجال العملة السايه بس ...

الهام : اجنا فى بورصه ولا فى مقبره !؟

ثريا هانم : الهام .. اذا ماكانش عاجبك كلامنا ..
خدى خطيبك مادام بقيتى حره وفى المنطقه
المره ..

رأفت : أحب أعرفك ياتانت ان هيام أعظم مكاسب
حياتى ..

ثريا هانم : وانت يا ابنى ياحبيبي ناوى تعمل ايه !؟
أحمد : أكيد حاقعد معاكى ...

ثريا هانم : وتحط المليون ونص بتوعك على النص
مليون بتوعى .. ونعمل مشروعات ونفتح
شركات ..

أحمد : آخر ما يمكن انى أفكر فيه .. دا تفكير
برجوازي ..

ثريا هانم : عاوز تتبرع بهم للفقرا ...

دهب : الطريق الوحيد اللى قدامنا يا أستاذ أحمد ..
نتجه بكل قوتنا للانتاج . احنا خلاص .. دخلنا
مرحلة الانفتاح الانتاجى ..

الهام : آف .. أنا زهقت من الكلام الفاضى دا كله ..
ثريا هانم : دا الكلام اللى حتعيشى فيه بعد كده طول
عمرك مع جوزك ..

رأفت : مش صحيح ياتانت .. أنا راسم لالهام حياه
تانيه ومستقبل تانى .. احنا حنعيش معظم حياتنا
فى اوروبا .. حاكون مندوب شركاتنا كلها اللى
بره ..

ثريا هانم : وبعدين ترجعها من اوروبا متطلقه وتتجوز
واحد نمساويه ولا ألمانيه وتتاجر فى الاسلحه ..
زى المخفى على عينه جوز اختها الاولانى ..

رأفت : صحيح ياسهام هانم !؟

الهام : ياماما احنا حبنا أنا ورأفت حب تانى .. وشكل
تانى ..

ثريا هانم : مافيش للحب شكل تانى • هو دا حب اليومين
•• دول وكله بالعمله الصعبه ••

رافت : انا مستعد اتنازل عن كل ما املك لالهام ••
•• ونسجل دا فى العقد ••

الهام : انتو عمالين تدخلونا فى موضوع وتخرجونا من
موضوع

سهام : الوضع معقد •••

ذهب : ايه وجه التعقيد ياسهام •• هيه مامتكم رفضت
حاجه •• ما هي قالت حاجي معاكم ••

الهام : خلصونا بقى ••

أم متولى : (تدخل مندفة كعادتها) ياثريا هانم ••
ياستى هانم ••

ثريا هانم : ايه تانى يام متولى ••

أم متولى : واحده ست جايه تسأل عليكى بره ••

ثريا هانم : روحى شوفيها مين ياسهام ••

ذهب : استنى • استنى انتى •• أنا اللي حاشوفها ••

تعالى معايا يام متولى (فى تلك الاثناء تكون الهام
قد بدأت توشوش خطيبها رافت بشكل واضح وهو

يهز رأسه مسرورا) ••

رأفت : موافق ..

رأفت : موافق ..

رأفت : موافق ..

ثریا هانم : هیه بتوشوشك على آیه !!؟

رأفت : مادام سیادتك باركتی خطوبتنا .. ووافقتی

على الرجوع للبيت انشاء الله .. أنا كنت مواعد

أخذ الهام معايا بور سعيد بعد ما انتظمن عليكی ..

وكمآن عندی مواعید وضروری آكون هناك

النهارده ..

ثریا هانم : هما كتبوا الكتاب !؟

الهام : كتاب آیه وزفت آیه .. واحنا الی بنقول عليكی

عقلها كبر ..

سهام : كفايه انها بتكلم الاموات !!

ثریا هانم : هابله یاسهام !! الله یسامحك انتی

راخره ..

أحمد : مالکیش غیری .. ومش حتقعدی مع حد

غیری ..

ثریا هانم : وما اقعدش الامعك ...

الهام : یوه .. یوه .. عن اذنکم .. یالله بینا یارأفت

.. أنا مسافره بور سعيد

ثرىا هانم : والفرح • هو انتو لسه اتجوزتم •••
رأفت : راجعين بعد يومين علشان نحدد مع سيادتك كل
الترتيبات •

ثرىا هانم طب فوتى على قبر أبوكى استأذنيه ••
الهام : تعالى نقرى لهم الفاتحة يارأفت ونمشى ••
رأفت : عن اذنك ياأستاذ أحمد •• عن اذنك ياسهام
هانم •• مبروك عليكى أبو الذهب بيه • (ويتجهان
الى باب المدفن)

سهام : ياماما انتى صدمتى الهام •• هيه دى أول مرة
تروح معاه بور سعيد •• ماهم كل اسبوع هناك
•• باليومين وبالتلاته ••

ثرىا هانم : وانت موافق على كده ياأحمد !!!
أحمد : الهام مش صغيره •• هو احنا عايشين فى القرون
الوسطى ••

ثرىا هانم : لك حق يابنى •• أنا ناسيه اننا فى عصر
الانفتاح ••

[الآن يدخل ذهب داعيا سونه هانم للدخول]

ذهب : اتفضلى ياهانم •••

ثريا هانم : مين ؟ الست سونه !؟

سونه : وحشاني موت .. كل ما اسأل عليكي يقولوا في
القرافه .. هو أنتي ياأختي كل يوم في
القرافه !!!

ثريا هانم : عايشه فيها .. ونايمه فيها .. ومش
منقوله منها .. تعالى اقعدى (وتأخذها لتجلس
معها)

سهام : حترجى تانى فى كلامك ...

أحمد : اعملى حسابك .. أنا ماغنتش حاجى ولاأتعايل
عليكى ..

ثريا هانم : وانت كنت جيت لى من امتى ؟! دا انت
الوحيد فيهم اللى ماجتليش ولا مره !!

أحمد : واجى لك ليه فى وسط الاموات .. أعمل
بالاموات أيه !!

سونه : يوه .. ياندامه .. هما الاموات دول مش أخوك
وابوك وخالك ياسى أحمد ..

أحمد : من فضلك ياهانم .. ماتتدخليش انتى ..

دهب : اهدى ياأستاذ أحمد ...

أحمد : دى حتجننا معاها ..

سهام : أعصابك !! ..

سونه : سلامات .. والله سلامات يا ثريا هانم .. عاش
من شافك .

ثرىا هانم : أخبارك آيه ياستى سونه .. ازى حسنين
بيه ..

أحمد : سهام .. أنا ماشى .. الحكاية حتطول ..

دهب : صبرك يا أستاذ أحمد ..

ثرىا هانم : (وهما تدخنان) قوليلى أخبارك .. ازى
حسين بيه !؟

سونه : حالسيب له الدنيا واللى فيها .. ماعنتش طايقه
سيرته .. حاجى أقعد معاكى ..

ثرىا هانم : وهو نسه حى !! مش تستنى أما يموت !!

سونه : هو أنتى فكرت لما يموت حاسأل عنه ولا حازور
قبره .. أنا معاكى .. وحافظل معاكى هنا ..

أحمد : بس .. أهو دا اللى كان ناقص ..

ثرىا هانم : ليه يا أبنى يا حبيبى .. هو هنا وحش !!

سهام : ياماما انتى مش كنتى وافقتى ترجعى الفيلا ..

أحمد : واتفقنا وانتهينا ..

ثر يا هانم : واسيب ستي سونه لوحدها !؟

أحمد : تيجي تقعد معاكي وأهى الفيلا طويله عريضه
.. تاخذ خمس عائلات ..

سونه : والحمد لله احنا عيله واحده طول عمرنا ..

أحمد : يعنى حضرتك حتشرفى فى الفيلا ..

سونه : رجلى على رجلها فى أى حته تروحها .. وانا
عادلى فى الدنيا غيرها بعد اللى عمله الخاين ..
اللس .. الجبان .. (وتبكى)

ثر يا هانم : ماتعيطيش .. لازم رجع للرقاصه ..

سونه : رقاصه مين .. الرقاصه ماخطفها منه دكتور
عظام .. زى انت ماقلت ياسى الاسطى دهب
بيه ..

ثر يا هانم : أمال يااختى عمل معاكى أيه !؟

سونه : سرسب منى فلوسى .. ومش عاوز يطلقنى ..
مقعدنى فى بيت وهيه فى بيت ..

ثر يا هانم : اتجوز عليتى !؟

سونه : واحده لاتسوى ولا تستاهل .. زى الموميا ..

قال آيه دكتوره فى الاقتصاد ولسه جايه من
أمريكا •• خلاها مشرفه على كل أعماله ••

ذهب : ماهى راخره جيباله معونه أمريكانى على
مشاتل تفاح ••

ثريا هانم : أمال خد منك ليه فلوسك !؟

سونه : أنا اللى سلمتهم له بايدى من أيام ماكنا بنعمل
التصفيه •• كان معاه توكيل رسمى منى ••
ضحك عليه وسحبهم ووزعهم على البنوك باسمه ••
•• خمس بنوك ••

ذهب : الكلام ده ايه !؟

سونه : وحياتكوا دا اللى حصل ••

ثريا هانم : طب وفلوسك اللى طلعت بعد التصفيه
الاخرانيه ••

سهام : ادتيهاله راخره ياستى سونه !؟

ثريا هانم : زى ما انتى عملتى ••

سونه : لاء ياستى هانم •• المحامى أنقذنى منه ••
خد عشره فى الميه وخلانى لفيت التوكيل واشترت
بيهم شهادات استثمار •• بيطلع لى منهم أرباح ••

ألفين جنيه شهري .. اعملى حسابك .. لو جيت
أقعد معاكى .. حاصرفهم على روى ..

أحمد : واحنا ذنبنا آيه نسمع الكلام ده كله ؟!
سونه : أنا جايه لكم علشان تخلصونى منه .. عاوزاه
يطلقنى ..

ذهب : ياستى سونه واحنا نقدر نجبره على الطلاق ؟!
سونه : بواسطة الامريكانيه ..
ثرىا هانم : هيه أمريكانيه ..
سونه : لاء يا اختى مصريه .. بس متعلمه فى أمريكا
.. مانت عارفها ياسى الاسطى ذهب بيه ؟!!

ذهب : (فزعا) أنا !!!
سونه : عضوه معاك فى مجلس الادارة بتاع بنك الى
أسى آيه .. S . A .

ثرىا هانم : ذهب ؟! دخلت البنوك ؟!
سهام : وماقتليش ليه !!
ذهب : دا بنك لسه تحت التأسيس .. عرضوا عليه
المساهمه فيه .. ولسه ماوافققتش ..
ثرىا هانم : لكن تعرفها ؟!

ذهب : يا هانم انا ما اعرفش حد غيركم .. انا بتاعكم
ومنكم .. سهام هانم دنيتي .. وانتو اهلي
وأحبابي .. وأولتي وأخرتي ..

أحمد : زجل دا ولا دجل يا ابو الذهب ...

ثر يا هانم : والنبي صعبانه عليه ياستي سونه .

سونه : ياريتته يموت زى بقية اللي ماتم ..

أحمد : الظاهر ان احنا مش حنخلص النهارده ..

ماما .. احنا عملنا اللي علينا .. عرضنا عليكى

تسيبي القرافه وترجمي .. وانتي وافقتي ..

سهام : وما نقدرش نعمل أكثر من اللي عملناه ..

ذهب : ياستي هانم ما فيش داعي تتعبي وتتعبينا

وياكى ..

ثر يا هانم : طبعاً .. مادام ضمننتها فى جيبك ..

سونه : هي مين يا اختي !؟

ثر يا هانم : الاسطى ذهب حيتجوز الاستاذة سهام ..

سونه : ألف مبروك .. عقبالك ياسى أحمد .. وعقبال

الهام ..

ثر يا هانم : اتجوزت خلاص :

أحمد : عن اذنكم .. أنا مش حاقدر استنى أكثر من

كده دقيقه واحده ..

سهام : قلتي آيه ياماما ..

ثرية هانم : حاقد هنا يومين مع الست سونه ..

وبعدين حاجي واجبها معايا ..

أحمد : وانا أعيش لوحدي !!

ثرية هانم : روح اتجوز زى ما اخواتك اتجوزوا ..

هو انت فقير ولا محتاج

سونه : ربنا يوفقه لبنت الحلال ..

ثرية هانم : شوف له واحده من ناحيتك تاخد فلوسه

يادهب ..

دهب : الكلام ده آيه ياهانم !؟

ثرية هانم : ماعدش فيه بنات حلال .. كلهم بنات

حراميه .. هات لى واحده تقبل تتجوز واحد

مايجبلهاش فيلا وعربيه .. ومايسفرهاش تعيش

بره

دهب : الكلام دا آيه ياهانم !؟

ثرية هانم : هو اللى ماشى مافيش غيره ..

أحمد : خلیکی معقوله یاماما ...

ثریا هانم : أمال فاکرها حتقول لواحد زیك عنده

ملیون ونصر .. هات لی شقه بخلو ..

أحمد : أنا فقدت احتمالی .. أنا ماشی ..

ذهب : (ممسکا بید سهام) واحنا کمان ماشین ..

ثریا هانم : (تشیعهم) اتفضلوا .. من غیر مطرود

ومع السلامه ..

سهام : مستنیینک یاماما ...

سونه : ماتخافوش .. أنا حاجیبهاکم واجی معاها ..

(وبعد خروجهم)

ثریا هانم : یكونوش هما الی وزینک علیه وباعتینک

لیه ..

سونه : ربنا یسامحک یاثریا هانم ..

ثریا هانم : ماتأخذنیش .. انتی فاکرانی جیه هنا

لیه جنب الاموات ..

سونه : من معزتک لیهم ...

ثریا هانم : أبدا !! أبدا !! عارفه لیه !! علشان الی

عایشین ماعدوش يتعاشروا .

سونه : أهى دى لكى حق فيها .. كلهم خاينين العشره
.. ولاعدش لحد منهم أمان ..

ثرىا هانم : قلتىها بلسانك واعترفتى .. وادنتى
شفتيهم وعرفتيهم وجربتيهم يبقى أنهو الابقى ..
الحى ولا الميت ...

سونه : الميت .. أشرف من الحى وأحسن من الحى
وأفضل من الحى .. لاخيخونك ولا خيخدعك
ولا خيسرقك .

ثرىا هانم : صدقتينى ..

سونه : كأنك مش ناويه ترجعى لهم ..

ثرىا هانم : حارجع لهم .. بعد الى اتعلمته منهم وانا
هنا .. حارجع لهم ..

سونه : الا صحيح ياستى ثرىا كانوا بيكلموكى من جوه
القبر !؟

ثرىا هانم : أنا كنت جايه هنا علشان أبعد عنهم وعن
متاعبهم ومصايبهم أخلى لى نفسى واشرح لى نفسى
وأعرف نفسى ازاي أقدر أعيش معاهم بعد
.. كده

سونه : هو أنتى مش حتعيشى معايا !!

ثرىا هانم : من غير ماتربطينى بيهم .. زيك زى الى
راقدين جوہ فى القبر .. لاتتكلمى ولاتتحدثى
ولايكون لك صلہ بعد ..

سونہ : وما انتقمش من حسنين !؟

ثرىا هانم : شفتى بقى .. ماہى دى مصيبة الميشہ
الى هما عايشينها .. كل واحد عايش ونقرہ
بنقر التانى .. مافيش حد عاد بيحب حد ..
ولا حد عاد بيطيق حد .. ولا حد عايز يعيش زى
حد ..

ام متولى : ستى هانم ...

ثرىا هانم : مين تانى يام متولى !!؟

ام متولى : العربيات جت تاخذكم من القرافہ ...

ثرىا هانم : تعالى معايا ياست سونہ ..

سونہ : على فين ياثرىا هانم ...

ثرىا هانم : نودع الى ماتم .. ونرجع للأموات الى

عايشين ...

وهكذا ينزل ستار الفصل الثانى

الفصل الثالث

المنظر :

مكتب رب العائلة الراحل فتوح بيك في فيلا
العائلة وهو منظر متروك لرؤية المخرج على ضوء
الواصفات التي يعدها موضوع المسرحية ومسياتي
احدائها ..

(يفتح الستار على أحمد ومعه ذهب أو الاسطى
ذهب)

ذهب : يا أستاذ أحمد .. أنا مش غريب عنك
ولا انساك فضلك . انت اللي دخلتني العيله
الكريمه ..

أحمد : قصدك العيله الطفيليه الغنيه .. ما انت
خلاص الفلوس أفقدتك وعيك .. بلاش الكلام
ده وحياتك ياعم ذهب معايا لانه مش حيفيدنى ..
ذهب : آيه اللي تاعبك بس !! اشرح لي .. احكى لي ..

فهمنى انت دلوقت أصبحت أكبر راس فى
العيله ..

أحمد : بالمليون ونص اللى ورثتهم فى غفله من
الزمن !؟

ذهب : أنا ما باتكلمش على الفلوس .. أنا باتكلم على
أخلاقك وطبعك وعقلك الكبير اللى يوزن بلد
بخالها .. من صغرك وانت الانسان الوحيد اللى
فيهم .. لك ثقافتك ولك رأيك .. وكفايه انك
صاحب مبدأ .. وكفايه تصرفك بعد الحادثة
الأليمة .. أثبت انك راجل بصحيح .. وصلتهم
كلهم لبر الأمان ..

أحمد : بعد ما وصلونى لبر اليأس والتعاسه ..
ما تفهمنيش غلط ياعم ذهب .. أنا كنت باحاول
أخلص نفسى منهم .. لقيتهم رمونى فى الجب زى
اخوات سيدنا يوسف .

ذهب : ما هو أنا مش ممكن أسيبك وانت فى الحاله
دى ..

أحمد : أنا لسه ما وصلتش ثلاثين سنه .. ما وعشى على
أبويا لما كان استرجى !! هو كان دكانه فى ؟!

ذهب : جنب الجراش اللي كنت باشتغل فيه .. ماهى
المعرفه جت من هنا ..

أحمد : أنا مافتحتش عيني الا واحنا فى بيت المنيل
بعد ماخذت بكالوريوس التجاره ..

ذهب : علشان كنت غرقان فى السياسه وفى الثوره وفى
الاشتراكية وفى الصمود والحرب واسرائيل ..

أحمد : ماكنتش دارى بكل اللي بيجرى حوله ..

ذهب : أبوك حاول يسفرك أمريكا تكمل تعليمك هناك
.. وانت مارضيتش . قلت ماقدرش أسيب
مصر ...

أحمد : ولما اتخرجت خرجنى من الوظيفه .. كان هو
واخويا عادل الله يرحمه فاكرنى طايش واهبل
ومجنون وحا افرح لما يسفرونى أمريكا ..
ذهب : وانت كنت بتوريهم وشك !!

أحمد : ويعنى هما اللي كانوا فاضيين لى .. دا انا
ماكنتش باعرف عنهم أى حاجه غير منك ..
عملوا ازاي الفلوس دى كلها !!! .. وبالسرعه
دى !! عملوها امتى وازاي .. دا احنا من عشر
سنين بس .. كنا يدوب عايشين !؟

ذهب : الكلام ده قبل ابوك مايسيب السروجيه ويشارك
فى محل قطع الفيار .. أيام ما بدت هوجة
الايوتومبيلات .. والبركه فى المقدم نصار جوز
أختك ..

أحمد : ما انا عارف ان دا هو اللي كان الاصل والمصدر
.. بعد ما حكموا عليه بالسجن وهرب لاوروبا
بالقرشين اللي سرقهم .. ابتدا يورد لهم
بضايه ..

ذهب : هو اللي كان بيرسم كل حاجه هناك .. واخوك
عادل الله يرحمه .. يسافر ويرجع .. مره نفتح
مكتب تصدير .. ومره نشتل فى أجهزة
التلينزيون والكهربا .. ومره نبتدى نورد لحمه
وبيض وبينه ومعلبات وأدوات تجميل .. كله
... كنه ...

أحمد : وأيه اللي لكم على الراجل ده اللي اسمه
حسين ..

ذهب : دان ابن خانة ابوك وبيبيع خضار على ناصية
بولوق .. بيه اسوك عادل مره من اوروبا ومعا
مشروع تربيته عجول ونفريخ دواجن .. خد

سلفه بضمانة ابوك .. واشتروا مزرعة شركة
عشرين فدان فى سكة سقاره ..

أحمد : وانا لادارى بحاجه ولا حاسس بحاجه مع دا
كله !!

دهب : مانت كنت فى الجيش ..

أحمد : جندونى سنه واحده بس ..

دهب : ونصار بيه بقدره قادر طللك شرك وهو قاعد
هناك فى باريس ..

أحمد : ماهو كان فاهم مادام معايا تجاره .. حيقدر
يشغلنى معاهم أنا راخر لحسابه .

دهب : رسم لك مع اخوك عادل مشروع تصنيع الجزم
والجلود الصناعى وجاب لكم توكيل من تلت
شركات طليانى ..

أحمد : ماانا ما قبلتوش وسبت عادل فيه لوحده ..

دهب : كنت بتصلع زى الشعره من العجين .. انت
بتقلب عليه المواجه دلوقت يا أستاذ أحمد ..

أحمد : ليه !! انت وضك غير وضى .. انت الشريك
الموافق وانا كنت الشريك المخالف ..

ذهب : ومع ذلك .. كنت معتبر قدام الخلق كلتها ..
سواق العيله ..

أحمد : ماهو دا اللى فادك وخلاك طلعت باللى طلعت
بيه ...

ذهب : دا أنا اتعلمت منهم علام .. خلاص بقى ..
الله يرحم اللى راحم .. ويسترها مع اللى
فاضلين ...

(فى تلك اللحظه يدق التليفون)

أحمد : (يرفع السماعه) ألوه .. أيوه .. مين .. أنا
أحمد .. أيه .. طالبنى أرشح نفسى واتبرع
للحزب !! رغبه عليا !! بتقول أيه !! طول عمرى
بتاع سياسه !! أيوه .. لكن أنا مش محترف
سياسه .. ومش منهم كمان .. عاوز تقابلنى
فى مكتبى .. أنا ماليش مكاتب .. باكلمك من
البيت اللى أنا عايش فيه .. اتفضل شرف ..
تعالى أى وقت يعجبك .. (ويضع السماعه بعنف
وسخط)

ذهب : مش حيسيبوك ياأستاذ أحمد .. ابوك وخالك
كانوا فى المجلس اللى فات .. والاستاذ عادل الله

يرحمه كان الدور عليه للمجلس اللى جاى ٠٠ ما انا
عملوا معايا كده برضك ٠٠

أحمد : وقبلت !!

ذهب : دفعت ثلاثين ألف جنيه للحزب ٠٠ وحيسيبولي
دايره مفتوحه ٠٠ كتر خيرهم ٠٠ ماهو مافيش غير
كده قدامنا يا احمد بيه ٠٠٠

أحمد : طبعا ٠٠ حتبقى عندك الشركات دى كلها
ولاتحميش ضهرك ٠٠ أى مليونير غيرك لازم
يعملها

ذهب : مانت برضه مليونير ٠٠٠

أحمد : (فى انزعاج يقوم ويلف ويدور وسط المكان)
ازاى بس !! ازاى بس أنا بقيت كده !! أفتح
واغمض ألقى معايا مليون ونص !!!

ذهب : تلاته مليون يا بيه ٠٠ انت ناسى بقية أموال
العيله وانت بقيت كبير العيله !!!

أحمد : أى عيله !! دا انا كنت أصغر واحد فيهم !؟

ذهب : النهارده بعد اللى حصل ٠٠ انت اللى بقيت
كبيرها ٠٠

أحمد : آه .. آه يانى !! دا شىء غير معقول !! دماغى
.. دماغى .. دماغى .. (تدخل سهام الآن) .

سهام : يالله بينا يادهب علشان نلحق نرجع على آخر
النهار .. مالك يا أحمد .. (وتمسك به) أحمد
.. مالك .. (وتوقفه)

أحمد : (ممسكا برأسه) مافيش حاجه .. شوية صداع
.. عندى صداع ..

سهام : يادهب ماتنساشى حفلة الميريدان الليله ..
لازم نرجع من اسكندريه قبل المغرب ..

أحمد : (يسترد وعيه) انتو مسافرين !؟

سهام : كنت جايه اتظمن على ماما .. لقيتها كويسه
الحمد لله .. بنينا تلت فيلات فى العجمى ..

دهب : رايعين نستلمهم النهارده علشان يبقوا مصيف
العيله كلها .. لك فيهم واحد مخصوص يا أحمد
بيه باسمك .. أقل ما يجب وكله من فضلك .

سهام : خد بالك من نفسك يا أحمد .. وخذ بالك من
ماما .. هو ماله يادهب .. (ذلك ان أحمد كان
قد رمى بنفسه هامدا على أقرب مقعد)

ذهب : أزمة وتفوت .. ماعدش بيضوت من الازمات
بسهولة ..

سهام : مع أنه طالع بأكبر نصيب فينا !؟

ذهب : ماهى هيه دى أزمته ..

سهام : لا يادهب .. دا هو كده من صفره .. عمرنا
مانعرف عنه حاجه ولا يقول لنا عن روحه
حاجه .. كان بيقتعد بالاسبوع والاسبوعين
مانشوفش وشه .. ولا يقول لنا عن روحه حاجه
.. عايش بنفسه ولنفسه ..

أحمد : (صارخا) دماغى .. دماغى .. اتفضلوا
اخرجوا بقى .. روحوا سافروا ..

سهام : من صفره طبعه كده .. بكره يفوق لروحه بعد
الفلوس ماتشخشخ فى أيده ..

ذهب : قضيته مش قضية فلوس ..

سهام : أمال قضية أيه !!

ذهب : قضية المستقبل .. انتى مش حتفهميه
ياسهام ..

سهام : أنا لا عاوزه أفهمك .. ولا عاوزه أفهمه ..
أورفوار يا احمد ..

ذهب : نشوف وشك على خير يا احمد بيه
أحمد : مع السلامة . . (وهو يقف مترنحا على سماعه
التليفون وهى تدق) آه . . آه يانى آه . . (ويرفع
السماعه) آلو . . مين تانى . . حسنين بيه عاوزنى
. . (ويفلق بوق السماعه بكفه) وانا ناقص حسنين
بيه راخر . . (ويعود للسماعه) أكلمه . . صباح
الخير . . أهلا يا بيه . . اتفضل . . أنا موجود فى
البيت . . (ويفلق السماعه بعنف ويعود ليدور
فى أنحاء الغرفة) وبعدين !! وأخرتها !!! (ويترنم
بالانجليزية) تو بى أور نوت تو بى . . أكون أو
لا أكون . . . هو دا السؤال !! ياسلام عليك
يا شكسبير خلق أخلد ضحايا الفساد . . وانا وسط
دول . . أصبحت فى نفس موقفه . . منتهى التفاهه
. . ومنتهى الفساد . . ومع ذلك . . هاملت عمل
أيه فى الفساد اللى كان بيحوطه من كل جانب . .
موت اوفيليا من الحسرة بعد ما قتل أبوها بالصدفة
. . قتل عمه . . وقضى على أمه . . وفى الآخر
ما قدرش الا انه يموت نفسه . . أموت نفسى . .
أموت نفسى . . أموت نفسى . . ماهى ما بلقهاش
حل الا كده . . (ويضع أصابعه حول عنقه) أخنق

نفسى ٠٠ أخلق نفسى واموت نفسى ٠٠٠
(فى تلك اللحظه تماما تكون ثريا هانم قد أقبلت
لتراه فى حالته اليائسه)

ثريا هانم : تعالى الحقى ياست سونه ٠٠ شوفى أحمد
بيقول آيه ٠٠

سونه : حصل حاجه ياأختى !!

ثريا هانم : بيخنق روحه وحيموت نفسه ٠٠
سونه : (تسرع ناحيته وهو لايزال واقفا فى منتصف
الغرفه وأصابه فوق عنقه) سى أحمد ٠٠ سى
أحمد بيه ٠٠ فوق لروحك ياابنى ٠٠

ثريا هانم : واقف متخشب ٠٠ حالة صرع ٠٠ زى
أخويا سليمان ٠٠

سونه : هو كان عنده صرع وهو صغير !!!

ثريا هانم : أبدا ٠٠ ماخذش الا الحصبه ٠٠٠

سونه : ياأختى أمال آيه اللى جرى له ؟!

أحمد : (يفوق الى نفسه ولهما) آيه اللى جابك انتى
وهى الساعه دى ٠٠ اخرجوا بره ٠٠ بره ٠٠
سيبونى لوحدى ٠٠ سيبونى فى حالى ٠٠٠

ثريا هانم : (تتقدم منه) مالك يا ابني يا حبيبي ؟!
أحمد : تعبان .. زهقان .. قرفان .. حيران .. مش
عارف أنا جيت منين و حارروح فين ؟!

سونه : لسه مافاقش من الصدمه .. ودى شويه عليه
لما يموتوا كلهم ويسيبوه عايش !!

أحمد : مين اللى قال لكم انى عايش ؟! أنا مش
عايش !! أنا ميت أكثر من الميتين .. اللى ماتوا
على الأقل انتهى مصيرهم .. انما أنا مصيرى
آيه ؟! أكمل اللى عملوه !! ماقدرش .. ماقدرش
أقبل اللى عملوه ولا أعيش على اللى عملوه ..

سونه : يا مصيبتى !! حالة صعبه خالص !! أنا ماشفتش
قبل كده حالة بالشكل ده !!

ثريا هانم : أحمد .. أنا حاجيب لك دكتور .. مش
ممكن تستمر حالتك كده لحد النهارده .. اذا كنت
أنا نفسى نسيت اللى ماتوا .. تبقى أنت مش قادر
تنساهم .. دا أنت لا كنت منهم .. ولا هما
كانوا منك ..

سونه : ازاي ياستى هانم !! انتى جايباه من راجل
تانى ؟!

ثرىا هانم : ماتخرفيش !! أجيبه من راجل تانى ازای
وهو أصفرهم !؟

سونه : انتى الى بتقولى مش منهم !!

ثرىا هانم : فى طبعه وسلوكه وأخلاقه وعيشته كلها :
أحمد : (فى هدوء) من فضلك ياماما .. من فضلك
ياستى هانم .. من فضلكم سيبونى .. والاحسن
ان أنا أسيبكم (ويتجه الى باب الخروج)

ثرىا هانم : (تمنعه) رايح فين !؟

أحمد : تعبان .. عندى صداع شديد .. مانمتش طول
الليل .. حارروح آخذ مهدىء واحاول أنام
أرتاح ..

ثرىا هانم : (ممسكة بتلابيبه) ياابنى دا أنت عايش
على المهدئيات ..

سونه : مادام بيرتاح فيها .. وماكلنا عايشين عليها ..
المهدئيات والسجاير ..

ثرىا هانم : كلام أيه دا يااختى !! أوعى تكونى بتاخدى
كمان حبوب هلوسه !؟

سونه : والنبى ماعاد ناقص الا اننا نشرب حشيش ..

واهو بقى مالى البلد .. اكبر تجاره زى مايقولوا
وقليل ان ماكان بيتاجر فيه ..

ثرىا هانم : هو مين !!

سونه : جوزى المحترم .. حسنين بيه المليونير ..

أحمد : (ليتخلص منهما) على فكره ياستى هانم ..
حسنين بيه اتكلم فى التليفون من شويه .. وقال
انه جى .. الظاهر انه عاوز يقابلك .. خليكى
هنا علشان تقابليه .. سيبنى بقى ياماما ..
(وكانت لاتزال ممسكة به)

ثرىا هانم : ماتاخدش غير حبايه واحده يا احمد ..
والتانيه خليها لبليل زى ماانا باعمل .. علشان
تعرف تنام ..

أحمد : (يتركهما ممسكا برأسه) دماغى .. دماغى ..
دماغى ..

سونه : وتقولى مش متأثر ولا زعلان .. هو حد فيكوا
زعلان غيره .. مسكين .. ماعدش قادر يمسك
أعصابه ويحوش الزعل ..

ثرىا هانم : طول عمره على الحاله دى .. من أيام ماكان

في ثانوى .. كان يبص في وشنا كلنا يبوز ويقعد
مقهور وسط الكتب والمجلات بتاعته .. واحنا في
نظرة زى مانكون قتالين قتله ..

سونه : المهم فى الراجل حسنين اللى جى .. آيه اللى
حاعمله معاه ياستى هانم ..

ثرىا هانم : أما يبقى يجى .. احنا عارفين جى
ليه !؟

سونه : علشانى طبعاً ..

ثرىا هانم : بعد ماسابك ورماكى سنه بحالها ! (وتصمت
وهى تتأمل سارحه) عارفه أنا بافكر له فى آيه ..
فى الجواز ..

سونه : طب ماهو متجوز بدل الواحد اتنين ...

ثرىا هانم : أنا باتكلم على أحمد ابنى .. مش حسنين
بتاعك (سابعه فى تأملها) كنا زمان فاكرينه بيحب
بنت خاله ..

سونه : اللى مات وياهم فى الحادثه !؟

ثرىا هانم : مانتى عارفاها ياست سونه .. صفاء ..
المتعجبه اللى اتغدت معانا أول امبارح ..

سونه : دا بيقولوا طلعت بمليون جنيه من ابوها ..
ثريا هانم : هيه الوحيدة اللي تنفعه .. ومقطوعه من
شجره .. أنتى شفتى كان يبص لها ازاي واحنا
بناكل .. أمها ميته بقى لها أربع سنين وابوها
لسه بلحمه فى القبر .. عز الطلب .. وكان
زمان بيعبها .. وكفايه انها بنت أخويا الله
يرحمه ..

سونه : جميله وحلوه .. دى عليها عيون ولا الغزلان
.. ولو انها دايمًا مغمياهم .. لكن أنا شفتها وهيه
من غير حجاب .. كانت بتغسل وشها .. قمر ..
والنبى أحلى من اللي بيطلعوهم فى السينما ..
وأحلى من بتوع التليفزيون ..

ثريا هانم : وخدى بالك .. من غير بويه ..
ما بتعطش أحمر فى شفايفها .. ولا بودره على
خدودها ..

سونه : بس أنا ما الحظتش انه ميال ليها .. دا ما كلمهاش
كلمتين .. وعلى الفدا ما بصلهاش بصبه ..

ثريا هانم : علشان الحجاب اللي هيه حطاه على وشها ..
حيبص لها ازاي وهيه مغطيه حواجبها ومغميه عينها

ولابسه جونتي في ايديها .. شفتي صوابها وهيه
بتاكل لما قلعت الجونتي .. مش مربيه ضوافرها
.. ولا ملونهاهم

سونه : أمال يااختي كانت في انجامة ازاي؟!!

ثريا هانم : دي مهندسه ..

سونه : مهندسه وتتحجب .. حسره علينا .. مهندسه
وتعمل في نفسها دا كله ..

ثريا هانم : عايشه مع خالتها وجوز خالتها .. وهيه
اللي بتصرف عليهم من ورثتها الثقيل .. باقول لك
مليون واكثر نصيبها من ابوها بعد الحادثه . جوز
خالتها مهندس .. وفاتح معاها شركة
مقاولات ..

سونه : يبقوا مش حينخلوها تتجوزه .. علشان تفضل
بفلوسها بين ايديهم ..

ثريا هانم : وهو ناقص فلوس !! آيه رأيك ياستي
سونه !! وأهو بيعزك ..

سونه : ما بيعزنيش .. بيعطف عليه بس ..

ثريا هانم : صبرك أما كامل كلامي .. هو مش ساعات
بيقعد معاكي ويسمع لك لما تشتكي له حالتك؟!!

سونه : بيشتم فيكم وفي احوالكم وفي عيشتكم السوده
.. وفي حظه المهيب اللى خلاه طلع ابنكم والمصيبه
التقيه اللى انتو وصلتوه ليها ..

ثريا هانم : احنا ياختى وصلناه لمصيبه !! هو حد ورث
اللى ورثه !! ولا حد وصل لى وصل له .. ياختى؟!
.. أنا شايفه راجل واقف على الباب .. دا جوزك
حسنين ..

سونه : أبو ريال وصل ...

ثريا هانم : حاقوم أنا ياختى واسيبك مع جوزك ..
(وتهم بالقيام)

سونه : ما أقابلوش لوحدى أبدا ياثر يا هانم .. خليكى
معايه (تمسك بها)

حسنين : (يدخل) يا صباح الخير .. يا صباح الفل ..
.. يا صباح القشطه .. ازى صحتكم ..

ازى صحتك ياثر يا هانم ... (مقبلا عليها)

ثريا هانم : اسأل على مراتك الاول ..

سونه : ربنا يغنينى عن سؤاله !! جى لى ليه النهارده!!
عاوز منى آيه !!

ثريا هانم : مش بس ياختى أما يقعد !!

سونه : أنا مش عاوزاه يقعد .. يقول كلمتينه ويمشى
.. أيه اللي انت عاوزه !؟

حسنين : فين أولا أحمد بيه ؟

سونه : يعنى انت مش جى علشانى ؟

حسنين : أنا أقدر أستغنى عنك زى مانتى استغنيتى
عنى ..

سونه : تلاقى الامريكانيه بتاعة منحة الدواجن
سابتك ..

حسنين : أنا اللي سبتها ...

سونه : وجى تاخذ الاستين المركونه من سنه ..

حسنين : أكلمك انتى ياست هانم .. مش حارد عليها
علشان ما اغلطش فيها .. فين سيد الكل !؟

ثرىا هانم : سيد الكل دا مين !؟

حسنين : الاستاذ أحمد .. هو فيه غيره ..

سونه : تعبان ونايم ومش حيقابلك ..

حسنين : ماله ياست هانم ..

ثرىا هانم : مقطوع عن الدنيا والى فيها .. مش
طايقنا ولا طايق نفسه ولا طايق عيشتنا ولا طايق

عیشته .. وانا متهیالی انه لو طال ينتحر ..
حینتحر

حسنین : ينتحر ازای وهو مترشح للمجلس .. هو
وجوز اخته أبو الذهب بیه .. دول من أساطین
الحزب ..

سونه : أنا فاکره .. قالهالی مره ..
ثریا هانم : قال لك أیه ؟!

سونه : الاسطی ذهب عاوز یخلیه ينتحر .. انتحار
سیاسی ..

ثریا هانم : حیموته هو راخر !! زی ماموت ابوه واخوه
وخاله !!

سونه : حنرجع تانی یاست هانم للسیره دی !!

ثریا هانم : مش انتی الی لسه قایلاها بلسانک ..

حسنین : انتو عایشین معاه ازای ولاتعرفوش عنه
حاجه ..

ثریا هانم : واخذ له جناح لوحده .. بعید عننا ..

الأکل ما بیاکلوش ویانا .. اسأل مراتک ..

ما بنشفوش الا کل فین وفین .. دا احنا عزمنا

صفاء بنت خاله ..

سونه : خلتنى رحت أترجاه على ما قبل يجى يشوفها
ويتغدى معنا ومعاها .. بيقول اتغدى مع
شبح ..

حسنين : شبح ..

سونه : أيوه .. أصلها عقبالنا كلنا .. متحجبه ..

ثريا هانم : ما بيقابلش حد ولا بيشوف حد الا الاسطى
دهب .. أنا حا امنه عنه قبل ما يخليه ينتحر ..

حسنين : ماتقدريش يا هانم .. أبو الذهب النهارده
هو اللى بيدير له كل أعماله .

سونه : وهو سى أحمد بيشتغل فى حاجه ؟!

ثريا هانم : مافيش وراه غير الكتب والجرايد والشوية
القلاضيش اللى بيعبوا يناقشوه فى السياسة ..

سونه : مع انهم بيقولوا عليه .. مشلول ...

حسنين : أيوه .. اشتكالى منهم راخرين .. بيعتبروه

مشلول .. عنده شلل سياسى وانتو اللى شلتوه ..

(هنل تماما تقبل سهام ومن وراءها ذهب)

ثريا هانم : يا اختى !! مين !! سهام .. انتو مش

كنتوا سافرتوا اسكندريه !!

ذهب : الهانم رجعتنا من نص السكه ..

سهام : هما الى سحبوا منك الرخصه .. طلع بينا من
الطريق الصحراوى وسابق على سرعة ميتين ..
كل شويه بتوع الرادار يوقفونا ويدفعوه مخالفه
.. وأخر مازهقوا منه سحبوا العربية
والرخصه ..

ثرىا هانم : ماتبتش عن القتل بالعربيات !!

سهام : ياسهام انتى مش كنتى مستعجله وعاوزانا نرجع
على المغرب ؟ ثم أنا فهمتك .. المرسيدس الجديد
كله كده .. سرعته العادية ميتين .. ماهى دى
العربية اللي بعتهالى المقدم نصار .. هديه ..

ثرىا هانم : علشان بعتناله بورقتين ...

ذهب : ياهانم نصيبه القانونى ولا منازع فيه .. حقه
وخذ حقه ..

ثرىا هانم : وادالك الهديه .. هديتين ... عربية ..
ومعامية ...

سهام : بتطعنينى ياماما ..

سونه : ماتزعليش .. طعنة لسان .. لا حتودى
ولا حتجيب .. حسنى ملافظك ..

سهام : مش حاررد عليها .. دهب هد حيلي وحطم
أعصابي ..

سونه : أجيب لك مهديء يا اختي وتروحي تتهمدي زي
أخوكي (وتخرجه من حقيبتها) خدي .. أنا أصلي
عائشه على المهدئيات . (سهام تأخذ الجبايه
وتنصرف)

دهب : هو الاستاذ أحمد تعبان !؟

ثريا هانم : لاء يا اخويه .. راح يستعد ..

دهب : يستعد لأيه !!؟

ثريا هانم : للانتحار

دهب : حينتحر !!!

ثريا هانم : مانت اللى عاوزه ينتحر ..

سونه : انتحار سياسى بس ...

دهب : آه .. قولى كده .. على فكره .. ماحدث جاله
للساعة دي ؟

حسنين : وانا جى شايف اتنين مستنينه تحت .. الظاهر
قالولهم انه نايم فاستنوا على مايصحى ..

ذهب : (يتنبه أخيرا لوجوده) لا مؤاخذه يا حسنين بك
.. أنا ما سلمت ش عليك ..

حسنيين : لحقت أوحشك .. ما احنا كنا مع بعض امبارح
.. لنص الليل ..

سونه : في الكباريه !!!

ثر يا هانم : علشان كده كان عاوز يخلص منها في سكة
الصحرا ..

ذهب : يا هانم احنا كنا في مجلس الاداره .. وفي
شركة ابنك الاستاذ أحمد ..

ثر يا هانم : أحمد ابني !! بقى راخر بتاع شركات !!
حسنيين : الاسطى ذهب واخذ منه توكيل بادارة كل
أعماله ..

ذهب : اذا كان دا سايب مليون ونص مردخين في
البنوك .. أقنعتة بعد غلب .. نخرجهم
ونحركهم .. وحسب رغبته وتوجيهه .. وكلها
شركات انتاجيه ..

حسنيين : كل شركاتنا النهارده .. أصبحت شركات
انتاجيه ..

دهب : أحسن ما يجمد فلوسه أو يوزعها على اللي يسوى
واللى مایسواش .. مش كان ممكن تقوم فى مخه
ويكون حزب راخر ويضيع اللي ورثه .. ياهانم .
لا يصح الا الصحيح ..

ثريا هانم : يعملها .. أحمد ابني يعملها ..

سونه : ماهو دا كمان اللي كايده .. زملاته اللي
مايقابلش غيرهم بياعيروه .. بيقولوله .. عندك
شلل سياسى ..

دهب : الكلام دا كله أنا عارفه وفاهمه ..

ثريا هانم : مانت كنت زيهم .. من الكادحين ..

دهب : دا اللي اضطرني أتقدم وانقذه منهم .. مش
كده يا حسنين بيه ..

حسنين : وهو يعنى كان وافق الا بعد غلب .. دا احنا
قعدنا شهرين نقنعه .. آيه فايده الفلوس لما
تتجمد فى البنوك .. (وينظر لزوجته)

سونه : ماتبصليش .. قلتها بلسانك .. صدقتيني
يا ثريا هانم .. جى ياخذ فلوسى اللي متجمده فى
البنوك ..

ثريا هانم : وانا يا اختى ما انا زيك مجمده فلوسى فى
البنوك ..

سونه : حياخدوهم منك .. اذا كانوا قدروا على سى
أحمد .. مش حيقدرُوا علينا ..

ثريا هانم : (تقوم بفته) ستى سونه .. ايدك على ايدى
.. تعالى اهربى منهم معايا ..

جسنين : حد طلب منكم حاجه !!؟

سونه : أمال انت جى ليه ؟ علشان سواد عيونى !!
أيدى آهه .. خدينى معاكى .. نروح نتجمد فى
الايوضه ..

ثريا هانم : تعالى معايا أوضتى .. أنا عملاها بترباس
(وتخرج معها)

دهب : هما مجانين دول ولا آيه !!؟

جسنين ماتنزعجش .. الادخار يعتبر من أعمدة الثروة
القومية وجزء لا يتجزأ من الانفتاح الانتاجى ..

دهب : على فكره .. أنا جبت استثماره الحزب بتاعة
الاستاذ أحمد .. ادهالى اتنين مندوبين وانا
طالع ...

حسنين : دول قاعدين تحت من ساعتين .. بس اياك
يوافق ..

دهب : هما اللي طالبينه معايا .. وانا خلاص دفعت له
التبرع ..

حسنين : وهو عارف !؟

دهب : مش عارف ولا قابل .. مع انهم عاوزين يكسبوه
.. بالقليل ياخذ مطرح والده ..

حسنين : بقى اللي مش قابل يدير أملاكه .. كان
حجروح يشتغل فى السياسه .. هو حكايته آيه
الاستاذ أحمد ياعم دهب ؟

(فى تلك اللحظه يدخل أحمد عليهما)

أحمد : الحكاية مش حكايتى أنا ياعم حسنين ..
الحكاية حكايتكم انتم ..

حسنين : دول كانوا بيقولوا حضرتك تعبان ونايم !!؟

أحمد : وانا عارف أناام ولا عارف أرتاح من اللي أنا
فيه .. أنا متشعلق بين السما والأرض .. زى
الى رقص على السلم ..

حسنين : سافر اتعالج فى اوروبا ..

أحمد : هو ذا الحل بتاعك يا حسنين بيه .. أوعى تكون
دى فكرتك يادهب !؟

دهب : وانا خلاص فاقد الوعي نهائى .. بلدنا أولى
بيننا .. مصر أولا .. الحل هنا .. والعلاج
هنا ...

أحمد : ماعدلهاش حل .. وما بقلهاش علاج ..

حسنين : هيه أيه يا أستاذ أحمد !؟

أحمد : الحاله اللى انتو وصلتونا ليه بوجودكم المفاجيء
وبملايينكم الشيطانى .. حبستونا فى زنزانه
الحاضر .. وقفلتوا علينا كل أبواب المستقبل ..

حسنين : (يهب فى حماس) كلام حلو .. كلام سياسى
مايفهموش غيرك ولا يقولوش غيرك يا أحمد بيه ..

أحمد : للأسف ان كل الناس بتقوله وكل الناس فهماه
.. لكن ما فيش حد لاقى حل .. ولا خلاص ..

دهب : خطوه .. خطوه يا أستاذ أحمد .

حسنين : البركه فيك .. بس انت ادخل الحزب وهما
يرشحوك فى المجلس وبعون الله تقدر تصلح كل
حاجه ..

أحمد : مستحيل .. مستحيل فى وسط اللخبطة دى
كلها حنقدر نخطى أى خطوه .. هو اللى لسانه
مربوط. ورجليه متكتفه .. يقدر يتحرك ..

ذهب : ماتنكرش ان البلد فيها تطور .. وأصبح فيها
اصلاح وحرية ..

أحمد : لكن لسه مليانه فساد .. لسه ناقصها كثير ..
حسنين : البركه فيك .. بس انت ادخل الحزب وهما
يرشحوك فى المجلس وبعون الله تقدر تصلح كل
حاجه ..

أحمد : ماחדش لوحده يقدر يصلح كل حاجه ..
حسنين : ادى له الاوراق ياسى ذهب يمضيها .. دا هما
اللى بيجروا وراك وبيسعوا اليك ..
أحمد : هما مين !؟

حسنين : الحزب .. بيقولوا انهم كلموك الصبح وانت
رحبت .. بعتوك اتنين مندوبين بطلبات
الانضمام .. وسى ذهب عمل اللى عليه وقدم
التبرع ..

ذهب : ودفعت الاشتراك كمان ..

أحمد : من ورايا يا اسطى ذهب؟! من غير ماتقول لي؟!
.. وانا خلاص ماليش رأى أقرره بنفسى!؟

حسنين : العفو يابيه ..

أحمد : ذهب .. انت أيه اللي جرى لك .. انت تايه
عن آرائى وأفكارى وموقفى .. دى حاجه ماحدث
يقدر يتصرف فيها غيرى ولا يتوكل عنى فيها بأى
حال .. هيه فلوس محطوطه فى بنك .. دا رأى
وفكر وموقف ..

حسنين : يا احمد بيه سياسة البلد كلها النهارده قايمه
على الأحزاب .. مش هيه دى الديموقراطيه اللي
دايخين عليها ..

أحمد : بقيت سياسى من أمتى ياعم حسنين ..
ذهب : الورق أهه ياأستاذ أحمد ...
أحمد : هاته .. حاا قطعها ...

حسنين : (يجرى ليمنعه) ارجع ياأستاذ .. ارجع ..
دا أبو الذهب دافع فيه آلاف الجنيهات ..

أحمد : اسحبهم .. روح اسحب الفلوس ورجع لهم
ورقهم (ويعطيها له) أنا حالفنى التوكيل اللي
اديتھولك نهائى ..

حسنين : وتدير أموالك بنفسك معنا !!!

أحمد : أنا حر فى أموالى .. ماهى هيه دى الميزه
الكبيره فى أوضاعكم .. كل واحد حر يكسب على
قد مايقدر .. وبالملايين ..

ذهب : بقت ميزه وانت كنت بتقول عليها سبب
الكارثة !!

أحمد : فى كل حاجه .. فى السياسة .. وفى الاقتصاد ..
وفى الثقافة .. شقلمتوا كياننا الاجتماعى ..
وأخضعتوا كل حاجه للبيع والشرا .. ومن غير
تسعيرة .. لا بقى فيه عواطف ولا بقى فيه صدق
ولا بقى أمانه ولا بقى فيه اخلاص وياما تاجرتوا
بالحب وكلمة الحب .. قضيتوا حتى على الانتماء
للوطن ذاته .. كل شىء أخضعتوه للفلوس ..

حسنين : ماهى كمان البلد والحمد لله مليانه فلوس ..
ياأستاذ أحمد اذا كنت مش عاوز تدخل الحزب
وتلغى التبرع .. أنا مستعد آخذ مكانك ..
ذهب : حل موفق ..

حسنين : خد شيك بكل اللى انت دفعته ياابو الذهب ..
وهات الأوراق وانا أمضيها وانضم معاك (أحمد
يضعك ساخرا) مبسوط يااحمد بيه .. أنا

وراكوا دائما ومعاكوا دائما .. سداد فى كل
لحظه ..

ذهب : (لاحمد) يرضيك الحل ده ؟!

أحمد : ما انت عارف ان هو الحل الطبيعى يا اسطى
ذهب .. بس اللى أنا مش فاهمه .. ازاي فكروا
فيه وتخطوا حسنين بيه !!?

ذهب : اسمه مدرج فى قوائم العضويه .. وكان
مسيرهم حيثصلوا بيه ..

حسنين : واصل أنا برضك مهما كان مش زيك يا أستاذ
أحمد .. دا انت عايش من صفر فى
السياسة ..

أحمد : ومبادئ غير مبادئهم ...

حسنين : كلها محصله بعضيها .. المهم مصلحة البلد
وخدمة البلد ..

أحمد : يعنى انتو ناويين تخدموا البلد باذن الله ..
حسنين : الله أكبر !! وأى خدمه يا احمد بيه !! قول له
يا ابو الذهب على المشروعات الانتاجيه اللى
ابتديناها .. وفى كل مجال .. صناعه وزراعه
واسكان وسياحه ..

ذهب : وسينما كمان ..

أحمد : سينما !!

ذهب : انتاج أفلام .. هو أنا ماقلتلكش على مشروع الأفلام والمسلسلات والكاسيتات والفيديو !؟

أحمد : (ساخرا) لاء .. ماقلتليش ..

حسنين : مااحنا مش قادرين نتلم عليك ..

أحمد : ولا حتقدروا بعد كده .. أنا حاسحب التوكيل بعد ماتدفع الضرايب وعاوزكم تصفوا موقفى معاكم ...

حسنين : يا احمد بيه احنا حنفضل طول عمرنا عايشين فى تصفيات !! ..

أحمد : (صارخا) صفونى .. صفونى ..

ذهب : وانت ناقص تصفيه ..

أحمد : صفونى .. أنا اتصفيت خلاص .. خلاص .. خلاص ..

(ويرمى بنفسه على الكنبه هامدا على دخول اخته
سهام)

سهام : مالك يا احمد يا اخويا .. انت مش كنت واخذ
مهدىء ونايم !! هو حصل له آيه تانى !؟

حسنين : عاوز تصفيه ...

سهام : ليه !! عنده استسقا .. فى صدره ولا فى
بطنه ..

أحمد : (يهب من رقدته) فى عقلى .. فى عقلى ياسهام .
.. فى عقلى ..

سهام : يا احمد وانت فيك الا عقل !؟

أحمد : خلاص ماعدش فيه عقل .. أنا اتجننت ..
اتجننت .. بقيت مجنون .. مجنون .

سهام : آيه الحكايه يادهب !؟

دهب : أزمه من الازمات الطارئه اللى بتيجى له ..

حسنين : مع انه راجل واقعى جدا ...

دهب : لكن حيدنه كده يتعرض للازمات .. لفاية
مايفوق نهائى ..

أحمد : دا تشخيصك يادهب !! طب آيه رأيك اللى أنا
فيه النهارده .. البلد كلها فيه .. واللى بيحصل

لى دا كله حاصل للناس كلها ٠٠ ماعدا انتم
بملايينكم ٠٠٠

حسنين : و حضرتك ماعندك ملايينك ٠٠ آمال طالب
تاخذها ليه !!

سهام : يا احمد انت مش ناقصك فلوس ٠٠ انت عاوز
عروسه ٠٠ عارف لو اتجوزت ٠٠ مش حيبقى فيه
فى الدنيا أسعد منك ٠٠ انت لازم تتجوز ٠٠

أحمد : (يبعدا وهى تحاول الاقتراب منه لتحتضنه)
ابعدى ٠٠ ابعدى عنى ياسهام ٠٠٠

ذهب : سيبه ياسهام ٠٠ سيبه فى حاله ٠٠٠

أحمد : (يواجه ثلاثهم) ٠٠ انتو لكوا حق تعتبرونى
مجنون ٠٠ والظاهر ان أنا مجنون ٠٠ لكن غضب
عنى ٠٠ من سنة تلاته وخمسين ٠٠ السنه الى أنا
اتولدت فيها ٠٠ ولفاية النهارده ٠٠ يعنى حوالى
ثلاثين سنه ٠٠ كل حاجه فى البلد اتغيرت ٠٠
بسرعة البرق اتغيرت ٠٠ لكن أنا مش قادر أتغير ٠٠
عارفين ليه !! لانى فتحت عنيه وهما بيقولوا لنا
الحريه والاشتراكيه ٠٠ عشت فى حلم كبير شغلت
به شبابى ٠٠ محسيتش بيكم ولا بشرواتكم

ولا بغناكم .. ويموت ابويا واخويا وخالى ..
وفجأة القانى صاحى من الحلم .. مليونير !!
عارفين يعنى أيه مليونير !! الناس بتنام وحتى من
غير مايناموا وهما عايشين فى أحلام اليقظه ..
بيحلموا بالثروه والجاه والقوه والنفوذ .. اخر
حاجه كنت أحلم بيها !! أصحى القانى فيها !!!
ومش عاوزنى أتجنن ؟! دا أنا لازم أتجنن ..
(تدخل الهام الآن .. ومعها رأفت فى تلقائيه
تامه)

الهام : ماما قافله الباب عليها ومش راضيه تفتح لنا
.. مع انى جايه مخصوص مع رأفت علشان
أشوفها !!

سهام : تعالى شوفى اخوكى الاول ..

الهام : (تتقدم نحوه وهو واقف زاهل هامد) أحمد ..
مالك يا احمد ..

سهام : اتجنن

دهب : بيقول على روحه اتجنن

الهام : بعد الشر عليك يا اخويا .. (تتبطب عليه) أحمد
.. (لايعرك ساكنا) مالك يا احمد ؟

رأفت : سلامتك يا استاذ أحمد ..

أحمد : (يخرج عن صمته) دفعت التبرع وانضميت
للحزب يارأفت بك ..

رأفت : من زمان ..

الهام : ورشحوه فى الدايره بتاعته .. دايره مغلقة ..
لكن انت أيه اللى عرفك !؟

سهام : بقى دا يا اخواتى كلام مجنون ..

الهام : تعالى ياسهام نخرج له ماما .. يمكن ترضى
تفتح لك انتى ..

سهام : حاولت قبلك .. مافيش فايده ..

دهب : روحى معاها ياسهام .. أكيد لما تلاقىكى انتى
وهيه .. ما يهونش عليها وتفتح ..

حسنين : الوليه بتاعتى معاها .. وسطوها وهى تأثر
عليها .. سلامات يارأفت بك ..

دهب : بقى لنا مده ماشفنكش ..

رأفت : أنا بعث لكم كل طلباتكم .. من الجمرى طوالى
.. المهم .. طمنونى على الاستاذ أحمد ..

أحمد : اتطمئن وحط في بطنك مليون بطيخه صيفي
يارأفت بيك ..

رأفت : يعنى انت دلوقت والحمد لله .. ما عندكش
حاجه !؟

أحمد : الحمد لله عندى مليون ونص ...

دهب : وصلوا اتنين مليون يا احمد بيه ..

أحمد : قوام كده !! فى أقل من سنه !!!

حسنين : حضرتك سيد العارفين .. الفلوس بتجيب
الفلوس .. ولا أيه يارأفت بيه ؟

رأفت : دوره النقدية عندى .. الجنيه بيحسب فى
السنه أوتوماتيكيا خمسه .. يخرج من حسابى
جنيه يرجع لحسابى خمسه .. والدولار كمان ..

أحمد : ومش عاوزينى أتجنن !!!

رأفت : أصلكم بتشتغلوا فى سوق مقيد ..

أحمد : لكن انت فى منطقه حره ونطاقها واسع .. مش
كده !؟

رأفت : مش بس كده .. أصل أنا كمان بادخل صفقات
جانبيه ..

أحمد : أنا مانمتش طول الليل امبارح ..

رأفت : ماهو باين على وشك ...

أحمد : كنت باحاول أفكر في حل .. ووجدت ان
أبسط وأسهل وأوضح الحلول المباشرة .. قانون
«من أين لك هذا!؟»

حسنين : طب ماهود أولى انه يخليك تقبل ترشيح الحزب
ولما تدخل المجلس تقدمه ..

أحمد : موجود .. اكتشفت انه موجود .. ماهو المصيبة
انه موجود .. لكن مين حيطبقه على مين .. وحتى
لو طبقوه .. مش حيجيب نتيجة لان الانفتاح اللى
حصل من الاول .. له ميت قانون وقانون وكلها
قوانين جانبية يارأفت ..

حسنين : ماهو علشان كده سموه الانفتاح .. اسم
على مسمى

أحمد : حد منكم يقبل انه يطبق عليه!؟

دهب : ياأستاذ أحمد انت تعبان ..

أحمد : مش تعبان .. أنا مشلول لانى بافكر تفكير

فردى .. ومش حاقدر اخلص نفسى من خيوط
العنكبوت .. فاهمنى يادهب ..

دهب : فاهمك .. لكن ما باليد حيله .. ماقدرش
أعمل زيك ..

أحمد : وانا قادر أعمل حاجه .. أنا مشلول ..
خلاص أصبحت مشلول ..

حسنين : انت محتاج لراحه تامه يا احمد بيه .. محتاج
لراحه ..

رأفت : أنا حاخذ الهام ونعمل جوله فى أوروبا بعد
أسبوعين .. آيه رأيك يا أستاذ أحمد لو جيت
معانا ..

حسنين : أحسن علاج ..

أحمد : انت بقيت دكتور كمان يا حسنين بيه !؟

حسنين : أنا بس اللى يهمنى صحتك ..

أحمد : صحتى عال والحمد لله .. زى البمب .. أنا
مافيش عندى أى عله غيركم .. انتوا علتى ..

رأفت : الظاهر ان فيه بينكم خلاف .. أنا طبعا مش

من حقى التدخل .. لكن بحكم الروابط العائليه
.. انا مش غريب عن حد منكم ..

(هنا بالذات تدخل الأم لاهفه مسرعه)

ثرىا هانم : فىن أحمد .. هاتولى أحمد .. ورونى
أحمد ...

أحمد : آيه ياماما !! فىه حاجه !!

سونه : يااختى ماهو عاقل أهه !!

سهام : هو اللى بيقول على روجه مجنون ..

ثرىا هانم : مش جديده .. طول عمره بيقولها ..
واحنا السبب فى جناه ..

أحمد : كنتى بتخلفينى ليه ياماما !؟

ثرىا هانم : أبوك يابنى .. وانا جبتك من نفسى ..

أحمد : ولىه مااطلعش الا منكم !؟

ثرىا هانم : وبتقولى عاقل ياستى سونه !!

سونه : يااختى والنبى مابه حاجه .. هو مش محتاج
فى علاجه الا لحاجه بسيطه

ثرىا هانم : نعملها له .. بس هيه آيه !!

سونه : اعملوا له .. غسيل مخ ...

أحمد : تانت .. انتى كنتى قبل كده فى المخابرات!!!؟

حسنين : خارجه من حاره أبو لحاف .. والله ماحد
عاوز غسيل مخ غيرك ..

سونه : مش دى الكلمه اللى انت فالح فيها ودائما
تقولها لى ..

حسنين : أنا حا اخنقك .. (ويتقدم نحوها)

سونه : مهما عملت .. أنا مجمده فلوسى .. وكلها
ودايع .. ماتنصرفش ..

ثرىا هانم : مش حيرتاح الا أما نعمل له اللى هيه بتقول
عليه ده ..

سهام : أيه رأيك يادهب!؟

دهب : مستعد أعمل كل اللى هو عاوزه ...

ثرىا هانم : (فى حنان تتقدم من أحمد) خليهم
يعملوهولك يا حبيبي ...

أحمد : هو أيه ياماما!?! ..

ثرىا هانم : مسح المخ ...

أحمد : أنا لوحدي .. ماينفمش .. بعد آيه ..
(وهو يواجههم) دا انتو في أقل من عشر سنين ..
مسحتوا مخ بلد بحالها ...

وهكذا يحل نزول ستار النهايه

المعادى سنة ١٩٨٤

نعمان عاشور

مطابع الهيئة المصرية العامة للكتاب

رقم الايداع بدار الكتب ١٥٦٣ / ١٩٨٥

ISBN ٧ - ٠٥٣١ - ٠١ - ٩٧٧ -

منتہی سور الأزہبکیتہ

WWW.BOOKS4ALL.NET

إثر حادث أليم مسرحية نعمان عاشور الجديدة ، تعتبر حلقة من سلسلة طويلة لمسرحياته الاجتماعية السابقة ، وهي تتصدى لمعالجة صلب قضاياها الاجتماعية من منابع جذورها الواقعية .
وتقوم على نفس أسلوبه الدرامى الذى يعتمد على رسم الشخصيات فى قالب كوميدي .
وموضوع المسرحية يدور حول تطورات حياتنا فى مختلف جوانبها داخل الإطار السياسى والأوضاع الاقتصادية والعلاقات الاجتماعية التى ينطق بها الواقع الحاضر .